



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu

Tribunál Distritál Dili

Marsu 2015

Sumáriu prosesu julgamentu kazu iha Tribunál Distritál Dili - Periódú Marsu 2015

Introdusaun

Iha Marsu 2015, JSMP kontinua hala'ó monitorizasaun iha Tribunál Distritál Dili. Iha periódú ne'e, JSMP monitoriza kazu 67 hosi total kazu ne'ebé julga iha tribunál refere.

Hosi kazu 67 ne'e involve kazu violensia ba jeneru 16 no restu involve krime sira seluk. Mesmu nune'e, kazu 12 seluk ne'ebé involve violensia bazeia ba jeneru públika ona liuhosi **Sumáriu Kazu Violénsia Bazeia ba Jéneru**, edisaun Marsu 2015.

Iha edisaun ne'e sei sumárizá deit kazu 55 ne'ebé involve ofensa ba integridade física simples ho natureza violénsia doméstika 1, violasaun seksuál 2 no maus tratus ba kónjuje 1.

Aleinde ne'e iha kazu krime sira seluk mak ofensa ba integridade física simples 13, burla agravada 2, ameasa no danu simples 1, danu agravada 2, burla agravada no falsifikasaun agravada 2, kondusaun sein karta no falsifikasaun ba dokumentu ka notasaun téknika 1, furtu agravadu 2, tentativa omisídiu 1, explorasaun ba jogu ilísitu 2, omisídiu negligente 1, obstrusaun ba autoridade públika 1, expozisaun ka abandonu 1, ofensa ba integridade física simples no krime ofensa ba integridade física grave 1, danu ho violénsia 1, ofensa ba integridade física grave 1, ofensa ba integridade física simples ho ameasa 1, ofensa ba integridade física simples ho agravaun 1, abuzu poder 1, danu simples 1 no dezobediensia 1 no kondusaun sein karta 14.

Entre kazu 55 ne'e, kazu 31 mak tribunál konklui ona nia prosesu no kazu 25 sei kontinua prosesu.

Tuir mai deskripsaun sumáriu julgamentu kazu ida-idak tuir data julgamentu iha tribunál :

1. Krime burla agravada no falsifikasaun agravada - Nú. Prosesu : 862/14.TDDIL

Rua setubal, Colmera, Dili Timor Leste
PoBox: 275
Telefone: 3323883
www.jsmp.tl
info@jsmp.minihub.org
Facebook: www.facebook.com/timorleste.jsmp
Twitter: @JSMPtl

Kompozisaun Tribunál : Koletivu
Juis : Dra. Jacinta Correia, Dra. Jumiati Maria Freitas no Dra.
Mariana Solana (estajiária)
Ministériu Públiku : Dr. Jacinto Babo Soares
Defeza : Dr. Sergio Dias Quintas
Konkluzau : Sei kontinua prosesu

Iha 03 Marsu 2015, Tribunál Distritál Dili hala'o julgamentu hodi rona depoimentu testemuña ba kazu krime burla agravada no falsifikasaun ne'ebé involve arguidu AMP hasoru kompañia Telemor. Kazu ne'e akontese iha 03 Outubru 2013, iha Distritu Dili.

Prosesu julgamentu ne'e sein prezensa arguidu tanba tribunál la konsege indentifika arguidu ninia paradeiru.

Ministériu Públiku akuza arguidu kontra artigu 267 Kódigu Penál kona-ba krime burla agravada no kontra artigu 304 Kódigu Penál kona-ba falsifikasaun agravada.

Iha julgamentu, testemuña MPM nu'udar funsionáriu BNU ne'ebé atende arguidu wainhira haruka osan, depoimenta katak iha 03 Outubru 2013, arguidu transfer osan hamutuk US\$4,000.00 ba númeru bankaria staff telemor sira.

Iha 04 Novembru 2013, arguidu ba transfer tan osan hamutuk US\$2,500.00 ba funsionáriu Telemor. Maibé depois liu semana rua, Manajer Programa Telemor, LW ba klaim iha banku BNU katak sira nia-osan US\$6,500.00 lakon. Depois manajer ne'e cek fila fali dokumentus transfer osan nian no foin detekta katak osan refere arguidu la haruka ba funsionáriu Telemor maibé haruka fali ba nia konta bankaria privadu.

Testemuña LW nu'udar Manajer Programa Telemor depoimentu ba tribunál katak asinatura ne'ebé iha kuitansi transfere laran la'os nia mak asina.

Iha alegasaun finál, ministériu públiku husu ba tribunál atu aplika pena prizaun tinan 6. Alegasaun ne'e bazeia ba deklarasaun hosi testemuña nain sira. Entretantu defeza husu ba tribunál atu aplika pena ne'ebe favorese ba arguidu.

Depois rona tiha alegasaun finál, tribunál anunsia ba ministériu públiku no defeza katak desizaun ba kazu ne'e sei notifika deit ba parte sira.

2. Krime violasaun seksuál - Nú. Prosesu : 1090/14.TDDIL

Kompozisaun Tribunál : Koletivu
Juis : Dr. Jose Maria de Araujo, Dra. Fransisca Cabral no
Dra. Mariana Solana (estajiária)
Ministériu Públiku : Dra. Bemvinda do Rasario
Defeza : Dr. Sergio Dias Quintas

Konkluziun : Absolve

Iha 05 Marsu 2015, Tribunál Distritál Dili julga kazu krime violasaun seksuál ne'ebé involve arguidu ABS hasoru RMA, iha 18 Outubru 2011, iha Distritu Dili.

Ministériu Públiku akuza katak iha 18 Outubru 2011, tuku 19:00 kalan lezada ba hola lili iha kios. Wainhira fila hosi kios, arguidu rasta obrigatóriu lezada ba iha du'ut laran no basa dala rua iha lezada nia hasan karuk, riba lezada ba rai no komete violasaun seksuál hasoru lezada.

Depois komete tiha violasaun seksuál, arguidu dehan katak “*O hakarak ba keixa iha O nia inanan ka ba tribunál mós hau la tauk*”.

Ministériu Públiku akuza arguidu kontra artigu 172 Kódigu Penál kona-ba violasaun seksuál.

Iha julgamentu, arguidu rezeita akuzasaun ministériu públiku no deklara katak nia nunka komete violasaun seksuál hasoru lezada. Arguidu deklara katak antes ne'e sira iha relasaun namoru hahu hosi 2006 to'o 2010. Maibe iha 2010, sira hakotu relasaun ne'e tanba família la konkorda no Arguidu fo ona US\$50,00 ba família lezada nu'udar simbolu taka tilun no ibun.

Maske nune'e, lezada kontinua reforsa akuzasaun ministériu públiku. Lezada deklara katak antes sira halo relasaun seksuál, arguidu dehan ba lezada katak sira halo relasaun seksuál ne'e atu família bele aseita sira nia relasaun. Tanba ne'e, lezada aseita hodi halo relasaun seksuál ho arguidu maibé to'o-ikus arguidu nia família nafatin la aseita sira-nia relasaun. Nune'e mak liutiha semana rua lezada ba hato'o keixa iha polísia.

Iha alegasaun finál, ministériu públiku husu ba tribunál atu absolve arguidu tanba la prova rekizitus krime violasaun seksuál. Aleinde ne'e, defeza mós aseita ho alegasaun finál hosi ministériu públiku atu absolve arguidu.

Iha 17 Marsu 2015, tribunál konklui prosesu ne'e no absolve arguidu hosi krime violasaun seksuál ne'e tanba arguidu la provadu komete krime violasaun seksuál hasoru lezada.¹

3. Krime kondusaun sein karta no falsifikasaun ba dokumentu ka notasaun téknika - Nu. Prosesu : 0012/15.TDDIL

Kompozisaun Tribunál : Singulár
Juis : Dra. Jacinta Correia
Ministériu Públiku : Dra. Remigia de Fatima
Defeza : Dr. Manuel Exposto
Konkluziun : Kondena ho pena multa

¹ Informasaun detallu kona-ba kazu ne'e nia prosesu bele asesu iha www.jsmp.tl iha Sumariu Kazu Violensia Bazeia ba Jeneru Edisaun-Marsu 2015.

Iha 05 Marsu 2015, Tribunál Distritál Dili hala'o prosesu julgamentu ba kazu krime kondusaun sein karta no falsifikasaun ba dokumentu ka notasaun téknika ne'ebé involve arguidu FC. Kazu ne'e akontese iha 12 Feveireiru 2015, iha Tasitolu, Dili.

Ministériu Públiku akuza katak 12 Feveireiru 2015, polisia halo pasa-revista no prende arguidu tanba kondus mikrolet sein karta kondusaun. Polisia deskobre katak arguidu nia-karta kondusaun la'os orijinal tanba identidade iha karta kondusaun la hanesan ho arguidu nia kartaun eleitoral.

Ministériu Públiku akuza arguidu kontra artigu 207 Kódigu Penal kona-ba kodusaun sein karta no kontra artigu 303 alinea (d) Kódigu Penal kona-ba falsifikasaun ba dokumentu ka notasaun téknika.

Iha prosesu julgamentu arguidu rekoñese tomak faktus hosi akuzasaun ministériu públiku no reforsa ho klarifikasaun hosi STAE katak arguidu nia naran loloos mak Francisco Celo. Entretantu hosi Diresaun Nasionál ba Transportes no Telekomunikaun prova katak número SIM ne'ebé arguidu uza, partense ba Abel Noronha nia naran.

Iha alegasaun finál, ministériu públiku husu ba tribunál atu kondena arguidu ho pena multa US\$320,00 ba krime kondusun sein karta. Entretantu, ba krime falsifikasaun dokumentus, ministériu públiku husu ba tribunál atu aplika pena multa US\$180,00. Iha parte seluk, defeza husu ba tribunál atu aplika pena ne'ebé kmaan tuir arguidu nia kondisaun ekonómia.

Tribunál konklui prosesu ne'e no kondena arguidu Fransisco Celo ho pena multa US\$300,00 ne'ebé sei selu US\$2,00 durante loron 150, no pena alternativu durante loron 80 prizaun. Tribunál mós proibiu arguidu la bele kondus motor durante fulan 6 maske iha ona karta kondusaun.

4. Kazu krime furtu agravadu – Nú. Prosesu : 1417/11.PDDIL²

Kompozisaun Tribunál	: Koletivu
Juis	: Dr. Jose Maria, Dra. Francisca Cabral no Dra. Maria Modesta (estajiária)
Ministériu Públiku	: Dra. Lidia Soares
Defeza	: Dr. Jose Maria Caetano (estajiáriu)
Konkluzau	: Kondena ho pena prizaun tinan 2 fulan 6 suspende ba tinan 3

² Informasaun kompletu kona-ba prosesu julgamentu bele asesu iha website jsmp : www.jsmp.tl. Iha sumariu kazu Tribunál Distritál Dili, Feveireiru 2015.

Iha 05 Marsu 2015, Tribunál Distritál Dili, prezide leitura akordaun ba kazu krime furtu agravadu no kondena arguidu Marcelo Maia no Domingos Mendonça ho pena prizaun tinan 2 fulan 6 suspende ba tinan 3 no kustu judisiál US\$20,00.

Antes ne'e, ministériu públiku akuza katak iha 21 Maiu 2011, maizumenus iha tuku 23:00 kalan, arguidu sira ne'ebé nu'udar siguransa iha EDTL, futu-lia hodi foti fiu rolu tomak ida iha armazen EDTL. Arguidu sira foti fiu ba faan hodi fahe benefisiu ba malu. Maibé, aktu ne'e la konsege realiza tanbá MdS ne'ebé mós nu'udar siguransa iha EDTL kaer toman sira.

Ministériu Públiku akuza arguidu nain rua kontra artigu 252 (d) no (f) Kódigu Penal kona-ba krime furtu agravadu tanba komete iha tempu kalan no ajente tama iha abitasaun, servisu públiku nia instalasaun.

5. Krime danu agravadu - Nú. Prosesu : 1206/14.TDDIL

Kompozisaun Tribunál	: Koletivu
Juis	: Dra. Ana P. Fonseca, Dra. Maria Modesta (estajiária) no Dra. Mariana Solana (estajiária)
Ministériu Públiku	: Dr. Vicente Brito
Defeza	: Dr. Jose da Silva
Konkluzau	: Sei kontinua prosesu

Iha 06 Marsu 2015, Tribunál Distritál Dili julga kazu krime danu agravadu ne'ebé involve arguida KBX hasoru EPBG, ne'ebé akontese iha 28 Setembru 2009, iha Kristu Rei, Distritu Dili.

Ministériu Públiku akuza katak iha 28 Setembru 2009, maizumenus iha tuku 07:00 dader arguida tuda lezadu nia uma no kauza lezadu nia vidru janela bo'ot ida rahun. Arguida dudu monu batako moru ne'ebé badaen sira hada hela no estraga tanki bee nian. Aktu hirak ne'e hamosu prejuizu ba lezadu maizumenus US\$3,000.00 ka US\$4,000.00.

Kazu ne'e akontese tanba lezadu halo moru no taka tiha dalan ne'ebé arguida uza bain-bain hodi tama sai hosi nia uma ba estrada públiku.

Ministériu Públiku akuza arguida kontra artigu 259 alinea (d) Kódigu Penál kona-ba danu agravadu ne'ebé nia prejuizu aas liu US\$1,000.

Iha julgamentu arguida konfesa parsialmente kona-ba faktu sira ne'e no deklara katak akuzasaun balun loos no balun la loos. Arguida deklara katak nia intensaun atu tuda polisia UN ne'ebé aluga lezadu nia uma tanba polisia ne'e ameasa arguida ho pistola wainhira arguida sobu hela moru. Maibé fatuk ne'e kona fali iha lezadu nia vidru janela hodi rezulta vidru rahun. Arguida mós rekoñese katak nia mak dudu monu blok, maibé arguida la iha koñesimentu kona-ba tanki bee-nian ne'ebé hetan estraga.

Entretantu lezadu deklara katak nia la hare akontesimentu maibé simu n informasaun hosi Polísia UN hosi Filipina ne'ebé aluga iha uma refere no badaen sira ne'ebé servisu halo lezadu nia moru.

Tanba prejuizu US\$3,000.00 ka US\$4,000.00 ne'ebé mak lezadu hato'o ba tribunál hamosu duvida, nune'e, ministériu públiku husu ba lezadu liuhosi tribunál atu kalkula didiak fila fali ninia prejuizu.

Defeza aseita ho pedidu refere, nune'e tribunál marka fali julgamentu ba iha 13 Marsu 2015, tuku 09:00 dader, hodi rona fali prezuiju serteza ne'ebé lezadu hetan.

6. Krime tentativa omisídiu - Nú. Prosesu : 1211/14.TDDIL

Kompozisaun Tribunál	: Koletivu
Juis	: Dra. Jacinta Correia da Costa, Dra. Jumiaty Maria Freitas no Dra. Sribuana da Costa (estajiária)
Ministériu Públiku	: Dra. Benvinda do Rosario
Defeza	: Dr. Staque Guterres
Konkluzaan	: Sei kontinua prosesu

Iha 05 no 06 Marsu 2015, Tribunál Distritál Dili prezide julgamentu ba kazu krime tentativa omisídiu ho agenda rona depoimentu hosi testemuña sira. Kazu ne'e involve arguidu AMM, DdJS no MdP hasoru AF (membru Task Force - PNTL), ne'ebé akontese iha 01 Janeiru 2014, iha Matadoru, Distritu Dili.

Testemuña RM nu'udar membru *Task Force* ne'ebé iha momentu ne'ebá hamutuk ho lezadu halo atuasaun iha fatin akontesementu depoimentu katak nia hare ho matan, arguidu AMM uza tudik atu sona lezadu. Maibé la konsege tanba lezadu tebe monu tiha arguidu no lezadu konsege hanehan arguidu. Wainhira lezadu hanesan hela arguidu AMM, derepente arguidu DdJS foti fatuk ida tuda kona iha lezadu nia tilun hun. Aleinde ne'e, testemuña mós hare arguidu MdP lori ai ida baku iha lezadu nia kotuk laran hosi distansia metru lima.

Testemuña LS nu'udar membru *Task Force* ne'ebé iha momentu ne'ebá lori kareta depoimentu katak nia la hare akontesimentu tanba nia iha kareta laran no kareta para dok hosi fatin akontesimentu.

Testemuña EE nu'udar arguidu DdJS nia família no JB nu'udar arguidu AMM nia família depoimenta katak maizumenus iha tuku 04:00 madrugada, polísia sira ba kaer arguidu iha sira uma. Maibé testemuña sira la hatene arguidu sira nia problema no iha ikus mak foin hatene problema ne'e

Depois rona tiha depoimentus hosi testemuña, tribunál marka fali prosesu julgamentu ba iha 27 Marsu 2015, iha tuku 16:00 lorokraik ho agenda alegasaun finál.

7. Krime ofensa ba integridade fízika simples - Núc : 0062/14.PDDIL/955/14.TDDIL

Kompozisaun Tribunál : Singulár
Juis : Dra. Jumiaty Freitas
Ministériu Públiku : Dr. Reinato Bere Nahak
Defeza : Dr. José da Silva
Konkluzau : Sei kontinua prosesu

Iha 06 Marsu 2015, Tribunal Distritál Dili hala'ó prosesu julgamentu ba kazu krime ofensa ba integridade fízika simples ne'ebé involve arguidu AL hasoru lezadu NN, iha 05 Juñu 2014, iha Aimutin, Distritu Dili.

Ministériu Públiku akuza katak iha 05 Juñu 2014, iha tuku 17:00 lorokoraik, arguidu para nia-motor iha lezadu nia kios oin. Lezadu ba muda sai tiha motor ne'e atu ema bele movimentu ba-mai.

Wainhira, arguidu mai no hare nia motor laiha ona fatin, arguidu husu se mak muda nia motor, no lezada hatan katak nia mak muda. Tanba ne'e, arguidu nervozu no tolok lezadu. Lezadu la simu no basa arguidu dala ida iha nia hasan loos. Arguidu foti ai-pedasuk ida atu baku ba iha lezadu nia ulun maibé lezadu satan netik ho nia liman.

Julgamentu ne'e hala'ó sein arguidu nia prezensa no tanba ne'e tribunál so rona deit deklarasaun hosi lezadu.

Ministériu Públiku akuza arguidu kontra artigu 145 Kódigu Penal kona-ba ofensa ba integridade fízika simples.

Iha prosesu ne'e, lezadu kontinua mantein faktu sira iha akuzasaun ministériu públiku no deklarata katak aktu ne'e rezulta lezadu nia liman naksala no bubu. Maizumenus durante fulan 2 nia laran, lezadu la bele hala'ó servisu.

Iha alegasaun finál, ministériu públiku husu ba tribunál atu kondena arguidu ho pena prizaun fulan 6 suspende ba tinan 1. Entretantu defeza, husu ba tribunál atu aplika pena ne'ebé kmaan tanba lezada mak basa uluk arguidu.

Depois rona tiha alegasaun finál, tribunál sei notífika desizaun ba parte ministériu públiku no defeza iha 17 Marsu 2015.

8. Krime ofensa ba integridade fízika simples - Núc : 2302/10.PDDIL/1185/14.TDDIL

Kompozisaun Tribunál : Singulár
Juis : Dra. Fransisca Cabral
Ministériu Públiku : Dra. Angelina Saldanha
Defeza : Dra. Agustinha de Oliveira (estajiária)

Konkluzau

: Omologa

Iha 06 Marsu 2015, Tribunál Distritál Dili prezide julgamentu tentativa konsiliaun ba kazu krime ofensa ba integridade fizika simples ne'ebé involve arguida IMS hasoru lezada FFG. Kazu ne'e akontese iha Distritu Dili.

Ministériu Públiku akuza arguida kontra artigu 145 Kódigu Penál kona-ba krime ofensa ba integridade fizika simples.

Iha prosesu tentativa konsiliaun ne'e arguida rekoñese nia sala no husu diskulpa ba lezada. Arguidu mós promete sei la repete ninia hahalok iha futuru.

Bazeia ba pedidu deskulpa hosi arguida, nune'e, lezada deziste tiha prosesu ne'e no husu atu tribunál hakerek arguida nia promesa iha akta desizaun.

Tanba ne'e, tribunál omologa prosesu ne'e no absolve arguida hosi akuzasaun ministériu públiku.

9. Krime furtu agravadu - Nú. Prosesu : 646/12.TDDIL

Kompozisaun Tribunál	: Koletivu
Juis	: Dra. Jacinta Correia, Dra. Jumiati Freitas no Dra. Maria Modesta (estajiária)
Ministériu Públiku	: Dr. Vicente Brito
Defeza	: Dr. Cancio Xavier
Konkluzau	: Sei kontinua prosesu

Iha 10 Marsu 2015, Tribunál Distritál Dili hala'o rejulgamentu ba kazu furtu agravadu ne'ebé involve arguidu VdB hasoru Ajensia *World Food Program* (WFP). Kazu ne'e akontese iha 21 Abril 2007, iha dalan Tasi Ibum Farol, Distritu Dili.

Ministériu Públiku akuza katak iha 21 Abril 2007, maizumenus iha tuku 11:00 dader, arguidu tula fos hosi Pontekais Dili atu ba rai iha armazen fos nian iha Pante Kelapa. Iha area besik Farol nian, arguidu hapara tiha kareta baskolante (númeru matrikula 50096) ne'ebé nia-rasik lori, hatun tiha foos no tula fali ba iha kareta nisan ida (númeru matrikula 12578 TL). Wainhira sei hatun hela foos ne'e, derepente polisia UN nian to'o iha ne'ebá no kaer arguidu no lori arguidu ba iha Polisia Estasaun Kaikoli.

Ministériu Públiku akuza arguidu kontra artigu 252 letra (k) no (l) Kódigu Penál kona-ba furtu agravadu tanba involve ema na'in tolu no kazu nia valor aas-liu US\$1,000.

Iha julgamentu, arguidu konfesa no rekoñese ninia hahalok no deklarata katak nia hanoin atu hatun foos saku 7, tanba situasaun krize 2006 mak obriga. Maibe, arguidu la konsege foti foos tanba impede tiha hosi polísia UN.

Entretantu, testemuña JB ne'ebé tula arguidu nia foos depoimentu katak iha tempu ne'ebá nia liuhosi Farol no arguidu husu nia para hodi tula nia foos no selu testemuña US\$20,00. Maske nune'e, wainhira arguidu nia konjak (DP) muda hela foos ba nia kareta, polísia kaer toman.

Depois rona tiha depoimentu hosi testemuña sira, tribunál marka fali prosesu julgamentu ba iha 07 Abril 2015, tuku 17:00 lorokraik ho ajenda kontinuasaun rona depoimentu hosi testemuña DP.

10. Krime ofensa ba integridade física simples – Nuc. 0274/14.DIDIL

Kompozisaun Tribunál : Singulár
Juis : Dra. Albertina Neves (estajiária)
Ministériu Públiku : Dr. Alfeio da Costa (estajiáriu)
Defeza : Dr. Marcelino Colo (estajiáriu)
Konkluzaan : Omologa

Iha 10 Marsu 2015, Tribunál Distritál Dili prezide julgamentu tentativa konsiliaaun ba kazu krime ofensa ba integridade física simples ne'ebé involve arguidu MSB hasoru lezada EdC nu'udar nia viziñu ne'ebé foin tinan 10, iha 25 Outubru 2014, iha Dili.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples.

Tribunál omologa kazu ne'e tanbá lezada deside atu dame malu ho arguidu. Tanbá, entre arguidu no lezadu di'ak malu ona no arguidu husu ona deskulpa.

Iha prosesu tentativa konsiliaaun ne'e, arguidu rekoñese nia sala no husu diskulpa ba lezada no no lezada nia família. Tanba ne'e, atraves liuhosi lezada nia inan, husu atu deziste tiha kazu ne'e.

Bazeia pedidu dezistencia ne'e, tribunál omologa prosesu ne'e no absolve arguidu hosi akuzasaun ministériu públiku.

11. Kazu krime ofensa ba integridade física simples - Nú. Prosesu : 887/14.TDDIL

Kompozisaun Tribunál : Singulár
Juis : Dra. Fransisca M. Cabral
Ministériu Públiku : Dr. Bartolomeo de Araujo (estajiáriu)

Defeza : Dr. Manuel Exposto
Konkluzau : Omologa

Iha 11 Marsu 2015, Tribunál Distritál Dili prezide julgamentu tentativa konsiliaun ba kazu krime ofensa ba integridade fizika simples ne'ebé involve arguida Lurdes da Silva hasoru Eugenia da Cruz Moreira nu'udar arguida nia viziña, iha 16 Janeiru 2012, iha Aldeia Mate Lahotu, Beto Timur, Distritu Dili.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fizika simples.

Iha prosesu tentativa konsiliaun lezada hakarak deziste nia kazu, maibé husu ba arguida atu labele repete tan ninia hahalok iha futuru.

Bazeia ba pedidu dezistencia ne'e, tribunál omologa prosesu ne'e no absolve arguida hosi akuzasaun ministériu públiku.

12. Krime explorasaun ba jogu ilísitu – Nuc. 0188/12.DIDIL

Kompozisaun Tribunál : Singulár
Juis : Dra. Francisca Cabral
Ministériu Públiku : Dr. Napoleão Soares da Silva no Dra. Simoa da Costa (estajiária)
Defeza : Dr. Marcal Mascarenhas no Dra. Joana Pinto (estajiária)
Konkluzau : Kondena ho pena multa

Iha 11 Marsu 2015, Tribunál Distritál Dili prezide leitura sentensa no kondena arguidu Jose da Costa Soares Magalhães ho pena multa US\$45,00 ne'ebé sei selu US\$0.50 durante lora 90. Tribunál prova katak arguidu komete krime explorasaun ba jogu ilísitu iha 11 Setembru 2014, iha Lesidera, Dili. Tribunál mós aplika pena alternativu durante lora 90 prizaun kuandu la selu pena multa refere.

Relasiona ho objetu krime sira hanesan osan US\$356,00 tribunál decide intrega ba estadu no destroi kupon ne'ebé polisia prende. Enkuantu, osan US\$250,00, tribunál decide atu intrega hikas ba arguidu tanba konsidera katak osan ne'e la'os mai hosi rezultadu explorasaun jogu ilísitu.

13. Krime ofensa ba integridade fizika simples - Nú. Prosesu : 0511/2012/DICMR

Kompozisaun Tribunál : Singulár
Juis : Dr. Jose Maria de Araujo
Ministériu Públiku : Dra. Ivonia Maria Guterres
: Dr. Alfeio B. da Costa (estajiáriu)
Defeza : Dr. Jose da Silva

Konkluzau : Sei kontinua prosesu

Iha 11 Marsu 2015, Tribunál Distritál Dili prezide julgamentu tentativa konsiliaun ba kazu krime ofensa ba integridade fizika simples ne'ebé involve arguidu MCdA hasoru AFLM. Kazu ne'e akontese iha Distritu Dili.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fizika simples.

Iha prosesu tentativa konsiliaun ne'e, lezadu nia-feen hakarak atu deziste tiha prosesu ne'e tanba agora dadaun lezadu servisu hela iha tasi laran. Maibé ministériu públiku husu atu lezadu nia feen halo karta deklarasaun katak lezadu la marka prezensa.

Bazeia ba pedidu hosi ministériu públiku ne'e, tribunál marka fali prosesu julgamentu ba fali iha 14 Abril 2015, tuku 14:30 lorokraik hodi rona deklarasaun hosi lezadu no kontinua ba leitura sentensa.

14. Krime omisídiu negligente - Nuc. 2002/10.PDDIL

Kompozisaun Tribunál : Singulár
Juis : Dra. Albertina Neves (estajiária)
Ministériu Públiku : Dr. Alfeio da Costa (estajiária)
Defeza : Dr. Marcelino Colo (estajiária)
Konkluzau : Sei kontinua prosesu

Iha 12 Marsu 2015, Tribunál Distritál Dili hala'o prosesu julgamentu ba kazu krime omisídiu negligente ne'ebé involve arguidu FdF hasoru MdS (idade tinan 2). Kazu ne'e akontese iha 08 Setembru 2010, iha Lurumata, Komoro, Distritu Dili.

Ministériu Públiku akuza katak iha 08 Setembru 2015, maizumenus tuku 14:00 lorokraik, arguidu nu'udar taxista, tula pasajeiru nain 5 tama ba iha estrada Lurumata nian. Iha estrada sikun, arguidu fo volta ba liman karuk no derepente soke lezada ne'ebé tama derpente iha estrada laran.

Insidente ne'e rezulta lezada sofre ran sai makas hosi ulun. Lezada ninia família lori-halai duni lezada ba iha ospital maibé la konsege salva lezada nia vida. Enkuantu, arguidu rasik entrega-aan kedas ba iha Eskuadra Polisia Komoro.

Ministériu Públiku akuza arguidu kontra artigu 140 Kódigu Penál kona-ba omisídiu negligente. Iha julgamentu ne'e, arguidu rasik la marka prezensa iha tribunál maske hetan ona notifikasaun hosi tribunál.

Testemuña RdR nu'udar ofisiál polisia tranzitu,depoimenta katak nia hetan informasaun hosi Eskuadra Polisia Komoro kona-ba asidente ne'e. Wainhiraa nia ba to'o iha fatin akontesimentu no hare katak taxi ida para duni iha fatin akontesimentu no hare ran fakar barak iha taxi nia oin.

Testemuña LC nu'udar mós polisia tranzitu depoimenta katak nia la haree bainhira arguidu soke lezada. Maibé, depoisde hetan telefone hosi Polisia Eskuadra Komoro, nia to'o ba kedas iha fatin akontesimentu. Testemuña haree katak arguidu nia taxi para hela iha ne'ebá no ran fakar barak iha taxi nia oin.

Depois rona tiha depoimentu hosi testemuña na'in rua, tribunál marka fali prosesu julgamentu ba iha 10 Abril 2015, iha tuku 15:00 lorokraik ho agenda kontinua rona depoimentu hosi testemuña seluk.

15. Krime obstrusaun ba autóridade públiku – Nú. Prosesu 0090/14.TDDIL³

Kompozisaun Tribunál	: Koletivu
Juis	: Dr. Jose Maria, Dra. Maria Solana (estajiária) no Dra. Albertina Neves (estajiária)
Ministériu Públiku	: Dra. Bemvinda do Rosario
Defeza	: Dr. Arlindo Sanches
Konkluzaan	: Absolve

Iha 12 Marsu 2015, Tribunál Distritál Dili, prezide julgamentu leitura akordaun no absolve arguidu Ling Xi Rong, He Ling, Chen Er Sai no Ling Xi Peng hosi krime obstrusaun ba autoridade públiku. Kazu ne'e akontese iha 15 Novembru 2013, iha Suku Kolmera, Distritu Dili.

Tribunál absolve arguidu sira tanba konsidera katak faktus sira iha akuzasaun ministériu públiku, la provadu hotu.

Tribunál absolve arguidu sira bazeia ba gravasaun hosi CCTV ne'ebé monta iha restaurante laran hatudu katak arguidu sira la komete krime ka asaltu hasoru polisia sira. Tribunál hetan katak polisia sira mak tebe monu arguidu sira nia moru restaurante nian no dada sai arguidu sira hosi restaurante laran no tula ba kareta laran no lori ba iha Eskuadra Polisia.

Prova hirak ne'e reforsa liutan mós hosi depoimentu testemuña Jacinto da Silva nu'udar seguransa iha restaurante refere. Aleinde ne'e, tribunál bazeia ba auto estadu médiku ne'ebé relata katak arguidu sira sofre kanek todan tanba hetan baku hosi polisia.

³ Akuzasaun kompletu hosi ministériu públiku, deklarasaun arguidu no sasin sira, inklui alegasaun finál Ministériu Públiku bele asesu iha website: www.jsmp.tl iha parte sumáriu kazu fulan Fevereiru 2015.

Iha julgamentu antes, Ministériu Públiku akuza arguidu sira ba krime obrusaun ba autoridade públiku tanba konsidera arguidu sira impede atuasaun polisia nian bainhira tenta kaptura arguidu sira tanbá kondus kareta ho kondisaun lanu todan.

16. Krime ofensa ba integridade fízika simples- Nú. Prosesu: 0079/14.DIBCR/885/14.TDDIL

Kompozisaun Tribunál : Singulár
Juis : Dr. Antonino Helder
Ministériu Públiku : Dra. Bemvinda do Rosario
Defeza : Dr. José da Silva
Konkluzau : Sei kontinua prosesu

Iha 12 Marsu 2015, Tribunal Distritál Dili hala’o prosesu julgamentu ba kazu krime ofensa ba integridade fízika simples ne’ebe involve arguidu ASP hasoru lezada HSC, iha 2014, iha Distritu Dili.

Ministériu Públiku akuza katak iha tinan 2014, maizumenus iha tuku 17:00 lorokraik, arguidu fase hela motor no hase lezada maibé lezada la hatan. Tanba ne’e, arguidu nervozu no dehan ba lezada katak”o hanoïn hau la brani tuku o ka? Lezada husu ba arguidu katak “arguidu atu baku lezada kona-ba saida?. Depois arguidu foti tiha lezada nia telefone no baku lezada nia ulun dala haat, rasta no obriga lezada atu sae motor. Maibé lezada lakohi nune’e arguidu kontinua foti kapasete no baku iha lezada nia ulun.

Ministériu Públiku akuza arguidu kontra artigu 145 Kódigu Penal kona-ba ofensa ba integridade fízika simples.

Julgamentu ne’e hala’o sein arguidu nia prezensa. Enkuantu lezada kontinua reforsa faktu sira iha akuzasaun hosi ministériu públiku.

Iha alegasaun finál, ministériu públiku husu ba tribunál atu kondena arguidu ho pena prizaun tinan 2 suspende ba tinan 4. Defeza, husu ba tribunál atu tetu didiak provas sira atu aplika pena ne’ebé kmaan ba arguidu.

Depois rona alegasaun finál, tribunál marka fali prosesu julgamentu ba iha 27 Marsu 2015, tuku 15:00 lorokraik ho ajenda leitura sentensa.

17. Krime ofensa ba integridade fízika simples - Nú. Prosesu : 866/14.TDDIL

Kompozisaun Tribunál : Singulár
Juis : Dra. Jumiaty Maria Freitas
Ministériu Públiku : Dr. Rogerio Viegas (estajiáriu)

Defeza : Dr. Sebastião Amado de Almeida
Konkluzau : Sei kontinua prosesu

Iha 13 Marsu 2015, Tribunál Distritál Dili prezide julgamentu ba arguidu GdS ne'ebé komete krime ofensa ba integridade física simples hasoru LS. Kazu ne'e akontese iha 02 Novembru 2013, iha Hera, Distritu Dili.

Prosesu julgamentu ne'e sein prezensa arguidu tanba arguidu muda tiha ona nia hela fatin no tribunál la konsege notifika arguidu.

Ministériu Públiku akuza katak iha 02 Novembru 2013, arguidu hana lezadu nia ain kabun sorin karuk no rezulta ran sai maka-a'as no lezadu konsege hala'o tratamentu iha Ospital Nasionál Guidu Valadares. Kazu ne'e akontese tanba problema rai entre arguidu ho lezadu nia família.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples.

Iha prosesu julgamentu lezadu deklara katak antes akontesimentu nia simu telefone hosi nia tian katak ema baku nia tiun iha simetériu tanba problema rai. Depois simu telefone, lezadu halai kedas ba fatin akontesementu. Maibé iha dalan klaran, arguidu hana nia-ain kabun sorin karuk no rezulta ran sai maka-aas. Arguidu hana lezadu maizumenus hosi distansia metru 10.

Testemuña GdR nu'udar lezadu ni kolega depoimentu katak wainhira nia halai tuir lezadu, maibé antes to'o iha fatin refere, nia hare hosi distansia metru 20, arguidu hana kona iha lezadu nia ain kabun karuk. Tanba ne'e nia la konsege ba to'o iha fatin ne'ebé lezadu nia tiun hetan baku maibé ajuda lori kedas lezadu ba iha Klínika Hera.

Iha alegasaun finál, ministériu públiku husu ba tribunál atu aplika pena ne'ebé refleta ba artigu ne'ebé arguidu kontra, tanba arguidu ninia hahalok fo impaktu ba lezadu la bele hala'o servisu durante fulan tolu nia laran. Entretantu defeza husu ba tribunál atu kondena arguidu ho pena ne'ebé favorese ba arguidu no husu atu konsidera sirkunstansia atenuante sira antes foti desizaun.

Depois rona tiha alegasaun finál, tribunál marka fali prosesu julgamentu ba iha 23 Marsu 2015, tuku 09:00 dader ho ajenda leitura sentensa.

18. Krime expozisaun ka abandonu - Nú. Prosesu : 0120/10.PDDIL

Kompozisaun Tribunál : Koletivu
Juis : Dr. Jose Maria de Araujo, Dra. Maria Modesta
(estajiária) no Dra. Ercilia de Jesus (estajiária)

Ministériu Públiku : Dr. Vicente de Brito
Defeza : Dr. Cancio Xavier
Konkluzau : Sei kontinua prosesu

Iha 16 Marsu 2015, Tribunál Distritál Dili prezide julgamentu ba krime expozisaun ka abandonu ne'ebé involve LMdJ hasoru nia oan, iha Distritu Ermera.

Ministériu Públiku akuza katak iha 05 Maiu 2010, arguida hahoris bebe fetu ida iha kafe laran no husik hela bebe ne'e iha kafe laran. Maske nune'e, bebe ne'e konsege salva hosi señor ida ne'ebé liu iha kafe laran ne'e no rona bebe tanis.

Relasiona ho aktu ne'e, ministériu públiku akuza arguida kontra artigu 143 Kódigu Penál kona-ba krime expozisaun ka abandonu.

Iha julgamentu, arguida konfesa no rekoñese ninia hahalok no deklara katak nia komete krime ne'e tanba tauk ho reazen hosi família no moe ba comunidade tanba mane ne'ebé fo oan ba nia lakohi atu responsabilidade.

Tanba arguida rekoñese ninia hahalok, ministériu públiku presinde tiha testemuña no kontinua ba alegasaun finál. Iha alegasaun finál, ministériu públiku husu ba tribunál atu aplika pena prizaun tinan 3 suspende ba tinan 4.

Entretantu defeza husu ba tribunál atu aplika pena ne'ebé favorese ba arguida tanba arguida konfesa, arrende, foin permeira-ves komete krime no nunka komete tan krime to'o agora.

Depois rona tiha alegasaun hosi parte sira, tribunál marka fali prosesu julgamentu leitura akordaun ba iha 30 Marsu 2015, tuku 15:00 lorokraik.

19. Krime ofensa ba integridade fízika simples no krime ofensa ba integridade fízika grave – Núc.0347/12

Kompozisaun Tribunál : Koletivu
Juis : Dr. Jose Maria, Dra. Francisca Cabral no Dra. Maria Modesta
(estajiária)
Ministériu Públiku : Dra. Remigia de Fatima
Defeza : Dr. Manuel Exposto
Konkluzau : Sei kontinua prosesu

Iha 16 Marsu 2015, Tribunál Distritál Dili hala'o prosesu julgamentu ba kazu krime ofensa ba integridade fizika simples no krime ofensa ba integridade fizika grave ne'ebé involve arguida HM hasoru lezada LM no MdS. Kazu ne'e akontese iha 16 Feveireu 2012, iha Distritu Liquisa.

Ministériu Públiku akuza katak iha 16 Feveireu 2012, maizumenus iha tuku 09:00 dader, arguida nu'udar lezada nia banin feto boot, uza katana ba satan netik lezada LM iha dala klaran no sisi nia osan US\$700,00 ne'ebé arguida gasta wainhira lezada nia kaben mate.

Maibé, lezada dehan osan laiha, tanba ne'e arguida taa dala ida iha lezada nia kakorok no kontinua tebe, tuku dala barak iha lezada nia isin lolon no riba lezada ba rai no sama tan lezada. Maske nune'e, tanba katana ladun kroat, lezada sofre deit mean no bubu iha lezada nia kakorok.

Depois liutiha oras balun, iha tuku 14:00 lorokraik, lezada MdS (lezada LM nia-oan feto) hamutuk ho nia laen, JdS ba iha arguida nia uma ho intensaun atu ba husu tuir tanba-sa arguida asalta nia inan. Wainhira sira to'o iha odamatan, arguida simu kedas lezada no nia kaben ho katana. Arguida taa dala ida ba iha lezada nia kakorok maibé la kona tanba lezada satan netik ho nia liman loos. Aktu ne'e rezulta lezada nia liman fuan haat besik atu kotu no hetan suku pontu 13 no too agora lezada nia liman fuan haat ne'e sofre defisiensi permanente.

Ministériu Públiku akuza arguida kontra artigu 145 Kódigu Penál kona-ba ofensa ba integridade fizika simples ba krime hasoru lezada LM no kontra artigu 146 Kódigu Penál kona-ba ofensa ba integridade fizika grave hasoru lezada MdS.

Iha julgamentu, arguida rejeita akuzasaun ministériu públiku relasiona ho uza katana ba asaltu lezada LM iha dala klaran. Maibé arguida rekoñese katak nia taa dala ida hasoru lezada MdS iha nia liman loos tanba lezada insulta no tuda nia uma.

Entretantu lezada LM no MdS kontinua reforsa ba faktus sira hosi akuzasaun ministériu públiku. Faktu sira ne'e aneksa mós ho fotografia ne'ebé hatudu lezada LM nia kakorok ne'ebé bubu no mean maka-aas inklui auto estadu médiku relasiona lezada MdS nia liman fuan haat ne'ebé atu kotu.

Depois rona tiha deklarasaun hosi parte sira, tribunál marka fali prosesu julgamentu ba iha 23 Marsu 2015, iha tuku 14:30 lorokraik ho ajenda rona depoimentu hosi testemuña sira.

20. Krime danu ho violénsia - Nú. Prosesu: 920/2014/TDDIL

Kompozisaun Tribunál	: Singulár
Juis	: Dra. Fransisca Cabral
Ministériu públiku	: Dr. Vicente Brito
Defeza	: Dr. Francisco Caetano Martins (estajiáriu)

Konkluzau : Adia

Iha 16 Marsu 2015, Tribunál Distritál Dili adia julgamentu ba kazu krime danu ho violénsia ne'ebé involve arguidu JAdS no na'in rua seluk hasoru lezada ICLG. Kazu ne'e akontese iha Distritu Dili.

Ministériu Públiku akuza arguidu kontra artigu 260 Kódigu Penál kona-ba danu ho violénsia.

Prosesu julgamentu ne'e adia tanba arguidu sira la marka prezensa maske tribunál notifika ona. Tuir informasaun katak arguidu JA ba ona iha Inglatera no arguidu nain rua seluk, ida ba tiha ona Kupang no ida seluk sei halo tratamentu iha HNGV.

Tanba arguidu sira-nia auzensia, tribunál adia fali julgamentu ba iha fulan Abril 2015, maibé seidak marka data fiksi hodi hala'o prosesu julgamentu foun.

21. Krime ofensa ba integridade física grave - Nú. Prosesu : 912/2014/TDDIL

Kompozisaun Tribunál : Koletivu
Juis : Dr. Jose M. de Araujo, Dra. Fransisca Cabral no Dra. Maria Modesta (estajiária)
Ministériu públiku : Dra. Remiza da Silva
Defeza : Dr. Manuel Exposto
Konkluzau : Adia

Iha 16 Marsu 2015, Tribunál Distritál Dili adia mós julgamentu ba kazu krime ofensa ba integridade física grave ne'ebé involve arguida HM hasoru lezada LM no MdS, ne'ebé akontese iha Distritu Liquiça.

Ministériu Públiku akuza arguidu kontra artigu 146 Kódigu Penál kona-ba ofensa ba integridade física grave.

Julgamentu ne'e adia tanba testemuna AS ne'ebé tenki hato'o nia depoimentu la marka prezensa iha tribunál. Tanba ne'e tribunál marka fali prosesu julgamentu ba iha 23 Marsu 2015, tuku 14:00 lorokraik.

22. Krime ofensa ba integridade física simples no ameasa – Nuc. 0164/14.PDDIL

Kompozisaun Tribunál : Singulár
Juis : Dr. Antonio do Carmo
Ministériu Públiku : Dr. Reinato Bere Nahak
Defeza : Dr. Manuel Exposto
Konkluzau : Kondena ho pena prizaun fulan 6 suspende ba tinan 1

Iha 17 Marsu 2015, Tribunál Distritál Dili prezide julgamentu leitura sentensa no kondena arguidu Constançio Lopes ho pena prizaun fulan 6 no suspende ba tinan 1. Tribunál prova katak arguidu komete krime ofensa ba integridade fizika simples hasoru Duarte Ximenes no absolve krime ameasa tanba la provadu. Tribunál mós kondena arguidu selu kustu judisiál US\$10,00.

Antes ne'e, ministériu públiku akuza katak iha 14 Agostu 2014, maizumenus tuku 07:30 lorokraik arguidu ne'ebé nu'udar funsionáriu iha Diresaun Rekursu Umanus Ministériu Soliedaridade Sosial, buti lezadu nia kakorok no aperta ba didin lolon. Lezadu nu'udar Xefi Diresaun Rekursu Umanus iha Ministériu Soliedaridade Sosial. Kazu ne'e akontese tanba arguidu nunka hetan promosaun kareira hosi lezadu. Arguidu mós ameasa katak nia sei oho lezadu, bainhira hasoru lezadu iha dalan.

Iha prosesu julgamentu, arguidu rekoñese katak nia halo duni ofensa fiziku hasoru lezadu. Maske nune'e, arguidu deklara katak nia la ameasa lezadu. Arguidu mós deklara katak arrende no dame malu ona ho lezadu. Iha parte seluk, lezadu kontinua konfirma faktu hirak ne'ebé mai hosi akuzasaun ministériu públiku.

Antes ne'e, ministériu públiku akuza arguidu kontra artigu 145 Kódigu Penál kona-ba krime ofensa ba integridade fizika simples no kontra artigu 157 Kódigu Penál kona-ba krime ameasa.

23. Krime burla agravada no falsifikasaun agravada – Nú. Prosesu 2704/12.TDDIL⁴

Kompozisaun Tribunál	: Koletivu
Juis	: Dra. Ana Paula Fonseca, Dra. Sribuana da Costa (estajiária) no Dr. Ivan Patricinio Goncalves (estajiáriu)
Ministériu Públiku	: Dr. Vicente de Brito
Defeza	: Dr. Manuel Goncalves (advogadu privadu)
Konkluzau	: Sei kontinua prosesu

Iha 17 Marsu 2015, Tribunál Distrital Dili, prezide julgamentu apresentasaun faktus foun hosi arguida EM nu'udar (Kordenadora ba Organizasaun Centru Comunitáriu Aprendizajen/CCM), Suku Daro-leten, ne'ebé komete krime burla agravadu no falsifikasaun agravadu kontra WW nu'udar responsável Organizasaun International Development Center (IDC). Kazu ne'e akontese iha 08 Dezembru 2009, iha Distritu Liquisa.

⁴ Akuzasaun kompletu hosi Ministériu Públiku no deklarasaun hosi arguida, bele asesu iha website www.jsmp.tl iha sumáriu kazu Feveireu 2015.

Iha julgamentu ne'e, arguida apresenta resivu pagamentu saláriu staff CCM nian nomos gastus ba programa maibé arguida la konsege apresenta testemuña sira ne'ebé simu ona benefisia hosi orsamentu refere tanba testemuña sira okupadu.

Iha alegasuan finál, ministériu públiku mantein nia akuzasaun tanba konsidera arguida la konsege apresenta faktus adekuaudu hodi justifika utilizaun ba osan ne'ebé arguida foti ona. Tanba ne'e, ministériu públiku husu ba tribunál atu aplika pena prizaun tinan 3 suspende ba tinan 4. Ministériu Públiku mós husu ba tribunál atu obriga arguida atu fo fila fali prejuizu ne'ebe ajensia IDC lakon, kuandu IDC rekere fali sira nia osan.

Defeza diskorda ho pedidu hosi ministériu públiku, tanba konsidera katak faktu hirak ne'ebé arguida apresenta sufisiente ona. Tanba ne'e, husu ba tribunál atu aplika apresentasaun periódika ba arguida.

Depois rona tiha alegasaun finál hosi parte sira, tribunál marka fali prosesu julgamentu ba iha 25 Marsu 2015, ho ajenda leitura akordaun.

24. Krime ofensa ba integridade física simples ho agravasaun - Nú. Prosesu: 259/2014/TDDIL

Kompozisaun Tribunál	: Singulár
Juis	: Dr. Antonio Helder Viana do Carmo
Ministériu públiku	: Dra. Bemvinda da Costa do Rosario
Defeza	: Dr. Estaque Pereira Guterres (estajiáriu)
Konkluzau	: Kondena ho pena prizaun tinan 3 suspende ba tinan 3

Iha 17 Marsu 2015, Tribunál Distritál Dili prezide leitura sentensa ba kazu krime ofensa ba integridade física simples ho agravasaun ne'ebé komete hosi arguidu IM hasoru Paulino Pereira Saldanha (matebian). Kazu ne'e akontese iha 10 Marsu 2013, iha Distritu Dili.

Iha leitura akordaun ne'e, tribunál prova katak iha 09 Marsu 2013, arguidu hemu tua ho nia kolega sira inklui lezadu. Iha 10 Marsu 2013, arguidu kontinua hemu tua ho nia kolega sira no lezadu no ikus-mai akontese baku malu. Arguidu tebe iha lezadu nia hirus matan to'o lezadu monu tun ba iha baleta kuak. Lezadu konsege lori ba hala'o tratamentu iha óspital maibé liu oras 8 nia laran lezadu nia-is kotu. Iha relatóriu médiku hatudu katak lezadu nia ulun nakles.

Bazeia provas hirak ne'e, tribunál kondena arguidu ho pena prizaun tinan 3 suspende nafatin ba tinan 3.

Antes ne'e, Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 147 Kódigu Penál kona-ba agravasaun.

25. Krime abuza podér - Nú. Prosesu : 362/2013/TDDIL

Kompozisaun Tribunál : Singulár
Juis : Dra. Jacinta Correia da Costa
Ministériu públiku : Dr. Jacinto Babo
Defeza : Dr. Estaque Pereira Guterres (estajiáriu)
Konkluzau : Adia

Iha 17 Marsu 2015, Tribunál Distritál Dili adia prosesu rejulgamentu ba kazu krime abuza podér ne'ebé diskunfia involve arguidu CSM hasoru Estadu, ne'ebé akontese iha Distritu Dili.

Kazu ne'e adia bazeia ba ministériu públiku nia pedidu atu troka prokurador foun tanba nia sei iha relasaun família ho arguidu.

Antes ne'e, tribunál primeira instansia absolve ona arguidu hosi krime abuza podér maibé, ministériu públiku halo rekursu no tribunál rekursu husu atu halo julgamentu foun no altera krime abuza podér ba iha krime burla agravadu.

Tribunál adia fali prosesu julgamentu ba 28 Abril 2015, iha tuku 11:00, dader ho agenda primeiru rejulgamentu ba kazu krime burla agravadu.

26. Krime ofensa ba integridade física simples – Nuc. 0366/12. DIDIL

Kompozisaun Tribunál : Singulár
Juis : Dr. Ivan Patricinio Gonçalves (estajiáriu)
Ministériu Públiku : Dr. Pedro Baptista (estajiáriu)
Defeza : Dr. Manuel Exposto
Konkluzau : Adia

Iha 18 Marsu 2015, Tribunál Distritál Dili mós adia prosesu julgamentu ba kazu krime ofensa ba integridade física simples ne'ebé involve arguidu SSV hasoru ECM. Kazu ne'e akontese iha 2012, iha Distritu Dili.

Julgamentu ne'e adia tanba lezada la marka prezensa, no ida ba dala rua ona. Tribunál fo tempu loron 5 atu notifika lezada no kuandu lezada kontinua la marka prezensa, tribunál sei konsidera nu'udar pozisaun nonok hosi lezada, ne'ebé sei implika ba dezistensia keixa.

Maske nune'e, tribunál adia prosesu julgamentu kazu ne'e sein data hodi hein notifikasaun foun.

27. Krime explorasaun ba jogu ilísitu – Nuc. 0638/14.PDDIL

Kompozisaun Tribunál : Singulár
Juis : Dr. Nasom Sarmiento (estajiáriu)
Ministériu Públiku : Dr. Rogerio Viegas (estajiáriu)
Defeza : Dr. Marcelino Collo (estajiáriu)
Konkluzau : Sei kontinua prosesu

Iha 18 Marsu 2015, Tribunál Distritál Dili hala'o prosesu julgamentu ba kazu krime explorasaun ba jogu ilísitu ne'ebé involve arguidu JS iha 05 Agostu 2012, iha Audian, Distritu Dili.

Ministériu Públiku akuza katak iha 05 Agostu 2012, maizumenus tuku 06:30 lorokraik, polísia halo patrullamentu iha area Audian. Iha area ne'ebá, polísia kaer toman arguidu tuur hela iha motor leten besik estrada ninin no kaer hela kupon hodi halo tranzasaun ho comunidade balun.

Polísia sira deskobre katak arguidu faan hela kupon ilegál hosi Singapura. Polísia kaer kedas arguidu no prende mós kupon ilegál hamutuk ulun 5 no osan hamutuk US\$80,00.

Ministériu Públiku akuza arguidu kontra artigu 322 Kódigu Penál kona-ba expolorasaun ba jogu ilísitu.

Iha julgamentu ne'e, arguidu la marka prezensa iha tribunál, no arguidu representa hosi nia defeza.

Testemuña JP nu'udar membru polísia ne'ebé kaptura arguidu, depoimenta katak depois kaptura arguidu, sira lori kedas ba iha eskuadra polísia Dili. Iha eskuadra polísia nian, arguidu konfesa katak nia la'os na'in ba kupon refere maibé so faan deit.

Iha alegasaun finál, ministériu públiku husu ba tribunál atu aplika pena prizaun tinan 2 suspende ba tinan 3 no husu ba tribunál, atu deklara objeitu ba krime hanesan kupon no osan US\$80,00 partense ba Estadu.

Entretantu, defeza husu ba tribunál atu aplika pena ne'ebé adekuaudu ba arguidu, tanba arguidu foin primeira-ves mai tribunál no arguidu la'os nain ba kupon refere.

Depois rona tiha alegasaun finál, tribunál deside marka fali julgamentu ba iha 08 Abril 2015, iha tuku 16:00 lorokraik ho ajenda rona leitura sentensa.

28. Krime ofensa ba integridade fízika simples ho natureza violénsia doméstika - Nú. Prosesu : 0112/2012/TDDIL

Kompozisaun Tribunál : Singulár

Juis : Dr. Ivan Patrosino Antonino (estajiáriu)
Ministériu públiku : Dr. Hipolito Santa
Defeza : Dra. Olga Barreto
Konkluzau : Kondena ho pena multa

Iha 18 Marsu 2015, Tribunál Distritál Dili hala'o prosesu julgamentu ba kazu krime ofensa ba integridade física simples ne'ebé komete hosi arguidu CX hasoru nia feen. Kazu ne'e akontese iha 12 Janeiro 2012, iha Distritu Dili.

Ministériu Públiku akuza katak iha 12 Janeiro 2012, maizumenus iha tuku 09:00 kalan, arguidu tebe lezada nia kanotak, tuku hirus matan no kotuk laran. Aleinde ne'e, arguidu basa lezada nia hasan no kauza lezada hetan bubu no moras iha isin lolon. Kazu ne'e akontese tanba lezada husu osan ba arguidu atu sosa omu hodi fase labarik nia roupa.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 Lei Kontra Violénsia Doméstika.

Iha audiensia julgamentu arguidu deklara katak faktus sira ne'ebé mak konsta iha akuzasaun ministériu públiku nian ne'e loos hotu. Arguidu hatutan katak nia arrepende nia hahalok no sei la repete iha futuru. Aleinde ne'e, lezada mós kontinua konfirma faktus sira hosi akuzasaun ministériu públiku.

Iha alegasaun final, ministériu públiku husu ba tribunál atu aplika pena ne'ebé mak justu ba arguidu. Entretantu, defeza husu ba tribunál atu aplika pena admoestasaun ba arguidu tanba arguidu kolabora ho tribunál, konfesa nia sala, arrepende ninia hahalok no foin primeira-ves ba tribunál.

Iha 27 Marsu 2015, tribunál konklui prosesu ne'e no kondena arguidu ho pena multa US\$90,00 no sei selu US\$1,00 kada loron durante loron 90 no aplika kustu judisiál US\$20,00 ba arguidu.

29. Kazu krime kondusaun sein karta - Nú. Prosesu : 0027/Sum/2015/TDDIL

Kompozisaun Tribunál : Singulár
Juis : Dra. Fransisca Cabral
Ministériu públiku : Dr. Napoleão Soares da Silva (estajiáriu)
Defeza : Dr. Estaque Pereira Guterres (estajiáriu)
Konkluzau : Kondena ho pena multa

Iha 18 Marsu 2015, Tribunál Distritál Dili hala'ó prosesu julgamentu sumáriu ba kazu krime kondusaun sein karta ne'ebé involve arguidu JAdA. Kazu ne'e akontese iha 15 Marsu 2015, iha Metiaut, Distritu Dili.

Ministériu Públiku akuza katak iha 15 Marsu 2015, arguidu kondus motor hosi Area Branka mai Kuluhun. Wainhira to'ó iha kruzamentu Metiaut nian, polísia halo hela passa revista no prende arguidu nia motor no hatama arguidu iha sella polísia tanba arguidu kondus motor sein karta kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sein karta.

Iha julgamentu arguidu rekoñese ninia hahalok no deklarata katak nia seidak trata karta kondusaun tanba osan laiha.

Iha alegasaun finál, ministériu públiku husu ba tribunál atu kondena arguidu ho pena multa US\$90,00 ne'ebé kada lora koresponde ho US\$1,00. Defeza husu ba tribunál atu aplika pena multa US\$10,00 ne'ebé selu US\$0.50 durante lora 20, tanba arguidu nu'udar estudante, nomós foin primeira-ves mai iha tribunál.

Tribunál konklui prosesu ne'e no kondena arguidu ho pena multa US\$45,00 no sei selu US\$0.50 kada lora durante lora 90 no aplika pena alternativu lora 70 iha prizaun kuandu arguidu la selu pena multa refere.

30. Krime kondusaun sein karta - Nú. Prosesu : 0028/Sum/2015/TDDIL

Kompozisaun Tribunál	: Singulár
Juis	: Dra. Fransisca Cabral
Ministériu públiku	: Dr. Napoleão da Silva (estajiáriu)
Defeza	: Dr. Estaque Guterres (estajiáriu)
Konkluzau	: Kondena ho pena multa

Iha 18 Marsu 2015, Tribunál Distritál Dili hala'ó julgamentu sumáriu ba kazu krime kondusaun sein karta ne'ebé komete hosi arguidu AMX, iha 15 Marsu 2015, iha Ponte Aitarak –Laran, Distritu Dili.

Ministériu Públiku akuza katak iha 15 Marsu 2015, polísia tranzitu prende arguidu no hatama iha sella polísia tanba kondus motor sein karta kondusaun no halai kontra sinais tranzitu iha Ponte Aitarak laran.

Ministériu Públiku akuza arguidu kontra artigu 207 Kódigu Penál kona-ba kondusaun sein karta.

Iha audiensia julgamentu arguidu rekoñese ninia hahalok, arrepende no deklara katak nia seidak trata karta kondusaun tanba osan laiha.

Iha alegasaun finál, ministériu públiku husu ba tribunál atu kondena arguidu ho pena multa US\$90,00 ne'ebé sei selu US\$1,00, durante loron 90. Defeza husu ba tribunál atu aplika pena multa US\$ 10,00 ne'ebé arguidu sei selu US\$0.50 durante loron 20 tanba arguidu konfesa no arrepende nia hahalok no foin primeira-ves mai iha tribunál.

Depois avalia faktus hot-hotu hosi kazu ne'e, tribunál konklui prosesu ne'e no kondena arguidu ho pena multa US\$45, 00 ne'ebé sei selu US\$0.50 kada loron durante loron 90. Tribunál mós aplika pena alternativu durante loron 70 iha prizaun kuandu arguidu la selu pena multa refere.

31. Krime kondusaun sein karta - Nú. Prosesu : 0029/Sum/2015/TDDIL

Kompozisaun Tribunál : Singulár
Juis : Dra. Fransisca Cabral
Ministériu públiku : Dr. Napoleão da Silva (estajiáriu)
Defeza : Dr. Estaque Guterres (estajiáriu)
Konkluzau : Kondena ho pena multa

Iha 18 Marsu 2015, Tribunál Distritál Dili hala'o julgamentu sumáriu ba kazu krime kondusaun sein karta ne'ebé involve arguidu NdC no akontese iha 16 Marsu 2015, iha Kampung Alor, Dili.

Ministériu Públiku akuza katak iha 16 Marsu 2015, polísia tranzitu prende arguidu nia motor no hatama arguidu ba sella polísia tanba arguidu la-iha karta kondusaun no tula ema seluk sein kapasete.

Ministériu Públiku akuza arguidu kontra artigu 207 Kódigu Penál kona-ba kondusaun sein karta.

Iha julgamentu arguidu rekoñese ninia hahalok, arrepende no deklara katak nia seidak trata karta kondusaun tanba osan laiha.

Iha alegasaun finál, ministériu públiku husu ba tribunál atu kondena arguidu ho pena multa US\$90,00, atu prevene krime hanesan iha futuru

Defeza husu ba tribunál atu aplika pena multa US\$10,00; ne'ebé sei selu US\$0.50 durante loron 20, tanba arguidu konfesa no arrepende nia hahalok, foin primeira-ves ba tribunál no iha oan na'in rua.

Tribunál konklui prosesu ne'e no kondena arguidu ho pena multa US\$45,00 no sei selu US\$0.50 durante loron 90 no aplika pena alternativu durante loron 70 prizaun kuandu arguidu la selu pena multa refere.

32. Krime ofensa ba integridade física simples - Nú. Prosesu : 1045/14.TDDIL

Kompozisaun Tribunál : Singulár
Juis : Dra. Jacinta Correia da Costa
Ministériu Públiku : Dra. Bemvinda do Rosario
Defeza : Dra. Joana Cristina Pinto (estajiária)
Konkluzau : Sei kontinua prosesu

Iha 19 Marsu 2015, Tribunál Distritál Dili prezide julgamentu ba kazu krime ofensa ba integridade física simples ne'ebé involve arguida GdA, JP no arguidu IdC hasoru TG. Kazu ne'e akontese iha 17 Jullu 2014, Distritu Dili.

Ministériu Públiku akuza katak iha 17 Jullu 2014, maizumenus iha tuku 17:30 lorokraik, wainhira lezada no nia laen ho motor liuhosi arguida sira nia uma oin, arguida GdA tafui kaben ba iha motor oin no kona mós lezada.

Tanba ne'e, lezada hase arguida ho liafuan "*hei asu inan*" no lezada nia laen mós para tiha motor. Iha momentu ne'ebá, arguida GdA mai no dudu monu kedas lezada, nune'e lezada sofre kanek iha nia ain no liman sikun.

Wainhira lezada hamrik, arguida JP (arguida GdA nia oan-feto) sai hosi uma no mai tuku kedas iha lezada nia matan karuk no rezulta lezada nia matan metan no bubu. La kleur arguidu IdC, (arguida GdA nia subriñu) hakat ba dudu lezada to'o monu. Enkuantu lezada nia laen la halo asaun hasoru arguidu no arguida sira. Kazu ne'e akontese tanba problema rai.

Iha julgamentu arguidu no arguida sira rekuza akuzasaun ministériu públiku no deklarata katak arguida GdA no lezada dudu malu duni maibé lezada la monu. Sira mós deklarata katak iha momentu ne'ebá arguida JP no arguidu IdC nia intensaun atu haketak sira la'os dudu no tuku lezada.

Iha parte seluk, lezada no testemuña IG nu'udar lezada nia laen mantein faktus sira ne'ebé dekreve ona iha akuzasaun ministériu públiku nian.

Iha alegasaun ministériu públiku husu ba tribunál atu aplika pena prizaun tinan 2 suspende ba tinan 3 ba arguida na'in rua no arguidu.

Entretantu defeza husu ba tribunál atu tetu didiak tanba provas sira ne'ebé produs iha tribunál hamosu duvidas. Defeza husu ba tribunál aplika pena ne'ebé adekua ba arguida nain rua no arguidu. Defeza konsidera katak arguida no lezada dudu malu deit no arguida/u seluk ba sori no sira nia liman kona iha lezada.

Depois rona tiha alegasaun finál, tribunál marka fali prosesu kontinuasaun julgamentu ba iha 27 Marsu 2015, tuku 11:00 dader ho agenda leitura sentensa.

33. Kazu krime kondusaun sein karta - Nú. Prosesu : 0032/Sum/2015/TDDIL

Kompozisaun Tribunál : Singular
Juis : Dra. Francisca Cabral
Ministériu públiku : Dr. Napoleão Soares da Silva (estajiáriu)
Defeza : Dr. Marcelino Marques Coro (estajiáriu)
Konkluzau : Kondena ho pena multa

Iha 19 Marsu 2015, Tribunál Distritál Dili hala'o prosesu julgamentu sumáriu ba kazu krime kondusaun sein karta ne'ebé komete hosi arguidu FMdC. Kazu ne'e akontese iha 18 Marsu 2015, iha *selamat datang*, Tasi-Tolu, Distritu Dili.

Ministériu Públiku akuza katak iha 18 Marsu 2015, maizumenus iha tuku 23:00 kalan, polísia prende arguidu no hatama ba iha sella polísia tanba kondus motor iha estrada públiku, Tasi-Tolu sein karta kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sein karta.

Iha julgamentu arguidu rekoñese ninia hahalok, arrepende no deklara katak nia seidak trata karta kondusaun tanba foin fila hosi Indonezia.

Iha alegasaun finál, ministériu públiku husu ba tribunál atu kondena arguidu ho pena multa US\$90,00 ne'ebé kada lora sei selu US\$1,00. Defeza husu ba tribunál atu aplika pena ne'ebé mak kmaan ba arguidu tanba arguidu konfesa ba faktus hotu, hatudu nia arependimentu no foin primeira-ves mai iha tribunál.

Tribunál konklui prosesu ne'e no kondena arguidu ho pena multa US\$45,00 no sei selu US\$0.50 kada lora durante lora 90. Tribunál mós aplika pena alternativu fulan 2 iha prizaun kuandu arguidu la selu pena multa refere.

34. Krime kondusaun sein karta - Nú. Prosesu : 0033/Sum/2015/TDDIL

Kompozisaun Tribunál : Singulár
Juis : Dra. Fransisca Cabral
Ministériu Públiku : Dr. Napoleão da Silva (estajiáriu)
Defeza : Dr. Marcelino Marques Coro (estajiáriu)
Konkluzau : Kondena ho pena multa

Iha 19 Marsu 2015, Tribunál Distritál Dili hala'o prosesu julgamentu sumáriu ba kazu krime kondusaun sein karta ne'ebé involve arguidu LRdJ, iha 18 Marsu 2015, iha Tasi-Tolu (*selamat datang*), Distritu Dili.

Ministériu Públiku akuza katak iha 18 Marsu 2015, maizumenus iha tuku 23:10 kalan, polísia prende arguidu no hatama iha sella polísia tanba kondus motor iha area Tasi-Tolu sein karta kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sein karta.

Iha audiensia julgamentu arguidu rekoñese no arrepende ninia hahalok no deklarata katak nia trata ona karta kondusaun maibé la passa.

Iha alegasaun finál, ministériu públiku husu ba tribunál atu kondena arguidu ho pena multa US\$90,00. Defeza husu ba tribunál atu aplika pena ne'ebé mak kmaan tanba arguidu konfesa faktus hotu, hatudu nia arependimentu no foin primeira-ves ba tribunál.

Tribunál konklui prosesu ne'e no kondena arguidu ho pena multa US\$45,00 ne'ebé sei selu US\$0.50 durante loron 90 no pena alternativa fulan 2 iha prizaun kuandu arguidu la selu pena multa refere.

35. Krime ofensa ba integridade física simples - Nú. Prosesu : 961/14.TDDIL

Kompozisaun Tribunál : Singulár
Juis : Dra. Jacinta Correia
Ministériu públiku : Dr. Nelson de Carvalho
Defeza : Dr. Humberto Alves (estajiáriu)
Konkluzau : Omologa

Iha 20 Marsu 2015, Tribunál Distritál Dili prezide julgamentu tentativa konsiliausaun ba kazu krime ofensa ba integridade física simples ne'ebé involve arguidu Danio Fernando Lay hasoru Olinda de Araujo. Kazu ne'e akontese iha Bidau Santana, Distritu Dili.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples.

Iha prosesu tentativa konsiliaun lezada hakarak deziste kazu ne'e maibe husu ba arguidu atu la repete ninia hahalok iha futuru. Iha parte seluk, arguidu promete katak sei la repete ninia hahalok iha futuru.

Bazeia ba pedidu dezistencia ne'e, tribunál omologa prosesu ne'e no absolve arguidu hosi akuzasaun ministériu públiku.

36. Krime danu simples - Nú. Prosesu : 2608/2010/TDDIL

Kompozisaun Tribunál : Singulár
Juis : Dr. Nasom M. B. Sarmiento (estajiáriu)
Ministériu públiku : Dra. Bemvinda do Rosario
Defeza : Dr. Estaque Pereira Guterres (estajiáriu)
Konkluzau : Omologa

Iha 20 Marsu 2015, Tribunál Distritál Dili prezide julgamentu tentativa konsiliaun ba kazu krime danu simples ne'ebé involve arguidu AdC ho AdCS hasoru GdC, iha Distritu Dili.

Ministériu Públiku akuza arguidu sira kontra artigu 258 Kódigu Penál kona-ba danu simples.

Iha prosesu tentativa konsiliaun ne'e lezadu hakarak deziste kazu ne'e tanba sira dame malu ona no arguidu sira husu ona diskulpa ba lezadu.

Iha alegasaun finál, ministériu públiku husu ba tribunál atu omologa pedidu ne'e no absolve arguidu sira. Aleinde ne'e, defeza mós konkorda ho alegasaun finál hosi ministériu públiku.

Bazeia ba akordu hosi parte sira, tribunál omologa prosesu no absolve arguidu sira hosi akuzasaun ministériu públiku.

37. Krime kondusaun sein karta - Nú. Prosesu: 0063/Sum/2015/TDDIL

Kompozisaun Tribunál : Singulár
Juis : Dra. Fransisca Cabral
Ministériu públiku : Dr. Mateus Soares
Defeza : Dr. Abilio da Costa (estajiáriu)
Konkluzau : Kondena ho pena multa

Iha 20 Marsu 2015, Tribunál Distritál Dili hala'o julgamentu sumáriu ba kazu krime kondusaun sein karta ne'ebé involve arguidu AdJM ne'ebé akontese 16 Marsu 2015, iha Gleno, Distritu Ermera.

Ministériu Públiku akuza katak iha 17 Marsu 2015, maizumenus iha tuku 11:00 dader, polísia prende arguidu no hatama arguidu ba sella polísia tanba kondus mikrolet iha estrada publiku Gleno sein karta kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sein karta.

Iha julgamentu arguidu rekoñese no arrepende nia hahalok no deklara katak nia seidak trata karta kondusaun tanba osan laiha.

Iha alegasaun finál, ministériu públiku husu ba tribunál atu kondena arguidu ho pena multa US\$90,00 ne'ebé kada loron sei selu US\$1,00, durante loron 90.

Defeza husu ba tribunál atu aplika pena ne'ebé menus hosi pedidu ministériu públiku tanba arguidu konfesa faktus hotu, hatudu nia arependimentu no foin primeira-ves ba tribunál.

Tribunál konklui prosesu ne'e no kondena arguidu ho pena multa US\$45,00 no sei selu US\$0.50 durante loron 90 no aplika pena alternativu fulan 2 iha prizaun.

38. Krime dezobediensia - Nú. Prosesu : 0172/Sum/2015/TDDIL

Kompozisaun Tribunál	: Singulár
Juis	: Dra. Fransisca Cabral
Ministériu Públiku	: Dr. Napoleão da Silva (estajiáriu) no Dr. Bartolomeo de Araujo (estajiáriu)
Defeza	: Dr. Estaque Guterres no Dr. Zil Amaral (advogado privadu)
Konkluzau	: Absolve

Iha 20 Marsu 2015, Tribunál Distritál Dili prezide julgamentu sumáriu ba arguidu na'in 11 ne'ebé mak komete krime dezobediensia. Kazu ne'e akontese iha 17 Marsu 2015, iha Armajen, Ministériu Finansa, Tasi-Tolu, Distritu Dili.

Ministériu Públiku akuza katak iha 17 Marsu 2015, maizumenus iha tuku 10:30 kalan, polísia *task force* kaptura arguidu na'in 17 ne'ebé halibur hamutuk hela iha armajen Ministériu Finansa iha Tasi-Tolu. Polísia diskunfia arguidu sira hala'o treinamentu ilegal (kera sakti). Maske nune'e, depois polísia husik fila fali arguidu na'in 6 ne'ebé mak sei iha idade menoridade.

Ministériu Públiku akuza arguidu na'in 11 ne'e kontra artigu 244 Kódigu Penál kona-ba dezobediensia.

Iha audiensia julgamentu arguidu sira hotu nega total akuzasaun ministériu públiku. Arguidu sira deklara katak iha momentu ne'ebá sira tuur hamutuk koalia halimar la'os halo atividade treinu.

Arguidu PdS nu'udar seguransa sivil ne'ebé mak toma responsavel seguransa iha armajen refere deklara katak nia mak bolu arguidu sira seluk atu ba koalia halimar ho nia tanba sira koñese malu nu'udar viziñu.

Testemuña AdS no MTG nu'udar membru PNTL ne'ebé iha momentu ne'ebá halo passa revista iha fatin akontesimentu, depoimenta katak sira kaptura arguidu nain 16 tanba sira tuur hamutuk hela iha kuartu laraan, ahi mate hotu no odamatan mós save tiha hosi liur.

Iha alegasaun final, ministériu públiku husu ba tribunál atu kondena arguidu sira ho pena prizaun tinan 1 fulan 2 suspende ba tinan 2.

Iha parte seluk defeza husu ba tribunál atu absolve arguidu sira tanba laiha evidensia ida ne'ebé hatudu katak arguidu sira uja hela farda ka treina hela wainhira polísia sira to'o iha fatin akontesimentu.

Iha 23 Marsu 2015, tribunál konklui prosesu kazu ne'e no absolve arguidu sira hosi akuzasaun ministériu públiku tanba la iha prova.

39. Krime ofensa ba integridade ba física simples – Nú. Prosesu : 0276/14.TDDIL

Kompozisaun Tribunál : Singulár
Juis : Dra. Ana Paula Fonseca
Ministériu Públiku : Dra. Bemvinda do Rosario
Defeza : Dra. Marcia Sarmiento
Konkluzau : Adia

Iha 20 Marsu 2015, Tribunál Distritál Dili adia julgamentu ba kazu krime ofensa ba integridade física simples ne'ebé involve arguidu NG hasoru JFS, iha Tasitolu, Distritu Dili.

Julgamentu ne'e adia tanba lezadu la marka prezensa maske tribunál notifika ona. Tanba ne'e tribunál adia julgamentu maibe la define data fiksi ba julgamentu foun.

40. Krime burla agravada - Nú. Prosesu : 0138/14.TDDIL

Kompozisaun Tribunál : Singulár
Juis : Dra. Jumiaty Freitas (reprezenta juis kolektivu)
Ministériu Públiku : Dr. Domingos Goeva Barreto (estajiáriu)
Defeza : Dr. Marçal Mascarenhas

Konkluzau : Kondena ho pena supensaun no selu indemnizasaun US\$4,000.00

Iha 20 Marsu 2015, Tribunál Distritál Dili prezide leitura akordaun no kondena arguidu Lazario C.R. Ribeiro tanba provadu komete krime burla agravada hasoru Estadu Timor Leste. Kazu ne'e akontese iha tinan 2014, iha Ministeriu Agrikultura, Dili. Leitura sentesa ne'e hato'o sein arguidu nia prezensa no reprezenta deit hosi nia defeza.

Tribunál kondena arguidu ho pena prizaun tinan 3 suspende ba tinan 5 no kondena arguidu selu fali prejuizu US\$4,000.00 ba Estadu iha loron 15 nia laran. To'o tempu ne'e mak arguidu la selu maka arguidu sei kumpri pena efetiva tinan 3 iha prizaun.

Ministériu Públiku akuza arguidu kontra artigu 267 Kódigu Penál kona-ba burla agravada tanba maisumenus iha 2014, arguidu desvia trator ministériu agrikultura nian hodi benefisia ba nia aan sein koñesimentu hosi nia superior inklui ministru agrikultura.

41. Krime kondusaun sein karta - Nú. Prosesu : 0036 /Sum/15.TDDIL

Kompozisaun Tribunál : Singulár
Juis : Dra. Jacinta Correia da Costa
Ministériu Públiku : Dra. Lidia Soares
Defeza : Dra. Joana Cristina Pinto (estajiária)
Konkluzau : Sei continua prosesu

Iha 23 Marsu 2015, Tribunál Distritál Dili hala'o julgamentu sumáriu ba kazu krime kondusaun sein karta ne'ebé involve arguidu Augusto de Jesus, iha 20 Marsu 2015, iha Gleno, Distritu Ermera.

Ministériu Públiku akuza arguidu kontra artigu 207 Kódigu Penál kona-ba kondusaun sein karta tanba iha 20 Marsu 2015, maizumenus iha tuku 10:00 dader, arguidu halo movimentu sein karta kondusaun no la uza kapasete.

Iha audiensia julgamentu arguidu rekoñese ninia hahalok no deklara katak nia arrepende. Arguidu deklara katak iha momentu ne'ebá motor na'in mak husu ajuda arguidu ba taka roda motor tanba roda kuak.

Iha alegasaun finál, ministériu públiku husu ba tribunál atu aplika pena prizaun tinan 1 suspende ba 1 fulan 6. Defeza husu tribunál atu aplika pena ne'ebé favorese ba arguidu tanba arguidu konfesa, hatudu arependimentu no foin primeira-ves komete krime.

Depois rona tiha alegasaun finál hosi parte sira, tribunál marka fali julgamentu leitura sentensa ba iha 26 Marsu 2015, tuku 11:00 dader.

42. Krime maus tratus ba kónjuje - Nú. Prosesu : 0076/2014/TDDIL

Kompozisaun Tribunál : Koletivu
Juis : Dr. Antonino do Carmo, Dra. Jumiaty Freitas no
Dra. Sribuana da Costa (estajiária)
Ministériu Públiku : Dra. Ivonia Maria Guterres
Defeza : Dr. Marcal Mascarenhas
Konkluzan : Kondena ho pena prizaun tinan 2 suspende ba tinan 3

Iha 23 Marsu 2015, Tribunál Distrital Dili hala'o julgamentu ba kazu krime maus tratus ba kónjuje ne'ebé involve arguidu JdJ hasoru nia kónjuje, iha Dsitritu Dili.

Ministériu Públiku akuza katak maizumenus iha Marsu 2014, arguidu tuku dala rua iha lezada nia kabas no dala haat iha kotuk laran. Kazu ne'e akontese tanba arguidu diskunfia lezada iha relasaun ho mane seluk tanba arguidu hetan mensagen iha lezada nia facebook.

Iha 12 Jullu 2014, arguidu lori kapasete baku dala ida iha lezada nia kabun kidun, baku dala barak iha ulun, kotuk laran nomos iha ain loos no karuk. Arguidu mós ameasa lezada no lori kapasete tuda iha lezada nia kanuruk no kauza lezada monu. Aktu hirak ne'e rezulta lezada sofre moras iha ulun no isin lolok tomak. Kazu ne'e akontese tanba lezada dansa sein koñesimentu arguidu iha festa kazamentu ida.

Ministériu Públiku akuza arguidu kontra artigu 154 Kódigu Penál kona-ba maus tratus ba kónjuje konjuga ho artigu 35 (a) Lei Kontra Violénsia Doméstika.

Iha julgamentu arguidu konfesa, rekoñese, arrepende ninia hahalok no deklarara katak agora dadaun sira diak malu ona no moris nu'udar feen-laen. Aleinde ne'e, lezada mós kontinua konfirma deklarasaun hosi arguidu nian.

Iha alegasaun finál, ministériu públiku husu ba tribunál atu aplika pena prizaun tinan 2 suspende ba tinan 3. Defeza husu ba tribunál atu aplika pena ne'ebé kmaan tanba arguidu hatudu nia arependimentu, konfesa nia hahalok no foin primeira-ves ba tribunál.

Tribunál konklui kazu ne'e no kondena arguidu ho pena prizaun tinan 2 suspende ba tinan 3 no selu kustu judisiál US\$30,00.

43. Krime violasaun seksuál - Nú. Prosesu : 1336/14.TDDIL

Kompozisaun tribunál : Singulár
Juis : Dra. Jumiaty Freitas
Ministériu Públiku : Dra. Remigia de Fatima da Silva
Defeza : Dr. Albino de Jesus Pereira (estajiáriu)

Konkluziun : Adia

Iha 25 Marsu 2015, Tribunál Distritál Dili, adia julgamentu ba kazu violasaun seksuál ne'ebé diskunfia involve arguidu AdS hasoru EA.

Julgamentu ne'e adia tanba lezada la marka prezensa no sofre hela moras mental nune'e, tribunál adia julgamentu sein data fiksi.

44. Krime danu agravadu - Nú. Prosesu : 147/14.TDDIL

Kompozisaun Tribunál : Koletivu
Juis : Dr. José Maria de Araujo, Dra. Francisca Cabral no Dra. Albertina Neves (estajiáriu)
Ministériu Públiku : Dr. Renato Bere Nahak
Defeza : Dr. José da Silva
Konkluziun : Sei kontinua prosesu

Iha 25 Marsu 2015, Tribunál Distritál Dili, prezide julgamentu ba kazu krime danu agravadu ne'ebé involve arguidu MdRN no FC hasoru OMdC. Kazu ne'e akontese iha 06 Maiu 2013, iha Suku Bairopite, Distritu Dili.

Ministériu Públiku akuza katak iha 06 Maiu 2013, arguidu MdRN no FC lidera grupu rua no trasa planu ba estraga lezadu nia uma. Iha tuku 18:00 lorokraik, arguidu sira no sira nia grupu la'o ba iha lezadu nia uma. Iha ne'ebá arguidu no sira nia grupu sobu, estraga no sunu arguidu nia-uma.

Aktu ne'e rezulta lezadu lakon nia sasan uma laran hanesan TV 2, almariu 3, besikleta 1, bikan no kanuru, roupa no seluk-seluk tan.

Ministériu Públiku akuza arguidu sira kontra artigu 259 Kódigu Penál kona-ba danu agravadu ho nia moldura penál hosi tinan 2 to'o tinan 8.

Iha julgamentu, arguidu MdRN nega total akuzasaun ministériu públiku no deklara katak nia laiha fatin akontesimentu tanba nia ba ku'u hela kanko iha to'os. Entretantu arguidu FC la marka prezensa iha tribunál tanba agora daudaun iha Inglatara.

Iha parte seluk, lezadu deklara katak iha akontesimentu ne'e, nia la-hare rasik tanba nia iha hela servisu fatin. Lezadu rona tutan akontesimentu ne'e hosi nia maun FMdC (testemuña) no nia alin AMdC (testemuña).

FMdC depoimenta katak iha 06 Maiu 2013, nia no nia alin AMdC toba hela iha uma laran maibé wainhira nia hateke ba uma liur hare grupu sira ne'ebé lidera hosi arguidu MdRN no FC lao ba sira nia uma ho katana

Tanba hare ema barak, testemuña no AMdC halai ba subar tiha iha sintina kotuk, besik ho fahi luhan. Derepentí grupu sira ne'e taa no estraga airin uma nian, sobu estraga sasan uma laran no sunu uma.

Testemuña AMdC mós depoimenta katak nia hare Grupo MdRN ho FC kaer katana no tali asaltu lezadu nia uma. Iha momentu ne'ebá testetuña toba hela ho nia maun FMdC iha uma laran. Wainhira hare ema barak la'o mai lezadu nia uma sira tauk hodi halai subar iha fahi luhan besik ho sintina. Testemuña deklarata katak nia hare duni MdRN lidera hela grupu ida nomos grupu seluk lidera hosi FC lao mai ba iha lezadu nia uma. Testemuña dehan nia hare rasik MdRN nia grupu mak taa airin no arguidu FC sae ba uma kakuluk hodi kesi tali no dada tuun uma ne'e to'o monu ba rai, depois grupu rua ne'e sunu lezadu nia uma.

Iha alegasaun finál, ministériu públiku husu ba tribunál atu aplika pena prizaun tinan 6 ba arguidu MdRN tanba provadu komete krime, maske arguidu nega hotu faktus.

Defeza husu tribunál atu absolve arguidu MdRN tanba deklarasaun kona-ba fatin subar testemuña sira la-hanesan. Ida dehan sira subar iha sintina kotuk, besik fahi luhan no ida seluk dehan subar iha fahi luhan besik sintina kotuk.

Tribunál marka fali julgamentu leitura akordaun ba ba iha 10 Abril 2015, tuku 10:00 dader.

45. Krime amesa no danu simples - Núc: 0107/14.TDDIL/873/14.TDDIL

Kompozisaun Tribunál	: Singulár
Juis	: Dr. Antonino Helder
Ministériu Públiku	: Dra. Bemvinda do Rosario
Defeza	: Dra. Laura Lay
Konkluzau	: Omologa

Iha 26 Marsu 2015, Tribunál Distritál Dili prezide julgamentu tentativa konsiliausaun ba kazu krime amesa no danu simples ne'ebé involve arguidu RSR hasoru lezada AdA, ne'ebé akontese iha Distritu Dili.

Ministériu Públiku akuza arguidu kontra artigu 157 Kódigu Penál kona-ba krime amesa no artigu 258 Kódigu Penál kona-ba danu simples.

Iha prosesu konsiliaun ne'e arguidu rekoñese nia sala, husu diskulpa ba lezada no promete sei la repete tan iha futuru.

Bazeia ba akordu no pedidu dezistencia ne'e, tribunál omologa no absolve arguidu hosi akuzasaun ministériu públiku.

46. Krime ofensa ba integridade física simples - Núc : 0823/12.PDDIL/ 825/14.TDDIL

Kompozisaun Tribunál	: Singulár
Juis	: Dra. Jumiaty Freitas
Ministériu Públiku	: Dr. Reinato Bere Nahak
Defeza	: Dr. José da Silva
Konkluzau	: Adia

Iha 26 Marsu 2015, Tribunál Distritál Dili adia prosesu julgamentu ba kazu krime ofensa ba integridade física simples ne'ebé involve arguida MM hasoru AdS. Kazu ne'e akontese iha Distritu Dili.

Prosesu julgamentu ne'e adia tanba lezada no testemuña ne'ebé notifikadu la marka prezensa iha tribunál. Tribunál marka fali prosesu julgamentu ba iha 02 Jullu 2015, tuku 11:00 dader.

47. Krime ofensa ba integridade física simples - Núc : 0009/14.DICMR/848/14.TTDI

Kompozisaun Tribunál	: Singulár
Juis	: Dr. Ivan Patrisio Antonino (estajiáriu)
Ministériu Públiku	: Dra. Simoa da Silva (estajiária)
Defeza	: Dr. Estaque Guterres
Konkluzau	: Omologa

Iha 26 Marsu 2015, Tribunál Distritál Dili prezide julgamentu tentativa konsiliaun ba kazu krime ofensa ba integridade física simples ne'ebé involve arguidu SP hasoru JBJG, iha Distritu Dili.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples.

Iha prosesu tentativa konsiliaun ne'e arguidu rekoñese nia sala, husu diskulpa ba lezadu no promete sei la repete tan iha futuru. Tanba ne'e, lezadu deziste prosesu ne'e no husu tribunál atu hakerek arguidu nia promesa iha akta desizaun. Bazeia ba pedidu dezistencia ne'e, tribunál omologa prosesu ne'e no absolve arguidu.

48. Krime kondusaun sein karta - Nú. Prosesu : 0037/15.TDDIL

Kompozisaun Tribunál : Singulár
Juis : Dra. Jacinta Correia
Ministériu Públiku : Dr. Osorio de Deus (estajiáriu)
Defeza : Dr. Estaque P. Guterres (estajiáriu)
Konkluzau : Sei kontinua prosesu

Iha 26 Marsu 2015, Tribunál Distritál Dili, hala'o prosesu julgamentu ba kazu krime kondusaun sein karta ne'ebé involve arguidu ABA ne'ebé akontese iha 24 Marsu 2014, iha Becora, Dili.

Ministériu Públiku akuza katak iha 24 Marsu 2014, arguidu kondus mikrolet sein karta kondusaun hosi diresau Becora ba Merkadu Lama no soxe taxi ida nia lolon nakbetok no riska-riska iha dalan klaran besik prizaun Becora.

Ministériu Públiku akuza arguidu kontra artigu 207 Kódigu Penál kona-ba kondusaun sein karta. Iha julgamentu, arguidu deklarara katak nia arrepende ba ninia hahalok no promete sei la repete tan iha futuru.

Iha alegasaun finál, ministeriu públiku husu ba tribunál atu kondena arguidu ho pena prizaun tinan 1 suspende ba tinan 1. Defeza husu ba tribunál atu aplika pena multa ba arguidu tanba arguidu konfesa, rekoñese nia sala no arrepende ba nia hahalok.

Depoizde rona tiha alegasaun finál hosi ministériu públiku no defeza, tribunál marka fali julgamentu leitura sentensa ba iha 23 Marsu 2015, tuku 16:00 lorokraik.

49. Krime burla agravada - Nú. Prosesu : 1868/11.TDDIL

Kompozisaun tribunál : Koletivu
Juis : Dr. José M. de Araujo, Dra. Francisca Cabral no Albertina Neves (estajiária)
Ministériu Públiku : Dra. Bemvinda do Rosario
Defeza : Dr. Manuel Gonçalves
Konkluzau : Sei kontinua prosesu

Iha 26 Marsu 2015, Tribunál Distritál Dili hala'o prosesu julgamentu ba kazu burla agravada ne'ebé involve arguidu JES hasoru STS ne'ebé akontese iha 2011, iha Dili.

Ministériu Públiku akuza katak iha 2011, arguidu impresta lezadu nia osan US\$2,300.00 no promote fó fila tuir akorde ne'ebé sira konkorda hamutuk ona. Maibé arguidu la kumpri nia promesa tuir akordu ne'e. Tanba ne'e lezadu halo prosesu hasoru arguidu.

Ministériu Públiku akuza arguidu kontra artigu 267 Kódigu Penál kona-ba burla agravada ho nia moldura penál tinan 3 to'o tinan 10.

Iha julgamentu, arguidu arrepende ba ninia hahalok no intrega kedas osan US\$2,300.00 ne'e iha tribunál nia oin no promete sei la repete tan hahalok hanesan hasoru lezadu ka ema seluk. Lezadu perdua arguidu tanba arguidu entrega fila fali osan tuir montante ne'ebé nia impresta.

Iha alegasaun final, ministériu públiku, husu ba tribunál atu aplika pena prizaun tinan 2 suspende ba tinan 3, maske arguidu entrega ona osan ba lezadu no arrepende ninia hahalok. Entretantu, defeza husu ba tribunál atu aplika pena ne'ebé justu ba arguidu tanba arguidu mak responsavel família uma laran no iha oan nain 6.

Depois rona tiha alegasaun final hosi ministériu públiku no defeza, tribunál marka fali julgamentu leitura akordaun ba iha 13 Abril 2015, tuku 11:00 dader.

50. Krime kondusaun sein karta - Nú. Prosesu : 0038/Sum/2015/TDDIL

Kompozisaun Tribunál	: Singulár
Juis	: Dra. Jacinta Correia da Costa
Ministériu Públiku	: Dr. Rogerio Viegas (estajiáriu)
Defeza	: Dr. Estaque Guterres (estajiáriu)
Konkluzau	: Kondena ho pena multa US\$90,00

Iha 27 Marsu 2015, Tribunál Distritál Dili hala'o julgamentu sumáriu ba kazu krime kondusaun sein karta ne'ebé komete hosi arguidu MN. Kazu ne'e akontese iha 24 Marsu 2015, Kolmera, Distritu Dili.

Ministériu Públiku akuza katak iha 24 Marsu 2015, maizumenus iha tuku 20:00 kalan, polisia tranzitu prende arguidu no hatama ba iha sella polisia tanba kondus kareta angguna ida ho iha estrada Kolmera, sein karta kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sein karta.

Iha audiensia julgamentu arguidu rekoñese no arrepende ninia hahalok no deklarata katak iha momentu ne'ebá nia atu intrega kareta rerefe ba kareta na'in tanba antes ne'e kareta refere hadia iha nia ofisina. Arguidu mós deklarata katak nia seidak trata karta kondusaun tanba osan seidak laiha.

Testemuña SS (membru polisia) depoimentu katak nia no membru polisia sira seluk prende arguidu nia kareta tanba arguidu kondus kareta sein karta kondusaun.

Iha alegasaun finál, ministériu públiku husu ba tribunál atu kondena arguidu ho pena multa US\$10,00 tanba arguidu hatene hela katak nia laiha karta kondusaun maibé nafatin lori kareta.

Iha parte seluk, defeza husu ba tribunál atu aplika pena multa US\$5.00 tanba arguidu konfesa ninia no arrepende nia hahalok. Arguidu mós foin primeira-ves mai iha tribunál no laiha rendimentu ne'ebé fixu.

Tribunál konklui prosesu ne'e no kondena arguidu ho pena multa US\$90,00. Aleinde ne'e, tribunál mós aplika pena alternativu loron 60 iha prizaun kuandu arguidu la selu pena multa refere.

51. Krime kondusaun sein karta - Nú. Prosesu : 0039/Sum/2015/TDDIL

Kompozisaun Tribunál	: Singulár
Juis	: Dra. Jacinta Correia
Ministériu públiku	: Dr. Rogerio Viegas (estajiáriu)
Defeza	: Dr. Estaque Guterres (estajiáriu)
Konkluzau	: Kondena ho pena multa US\$90.00

Iha 27 Marsu 2015, Tribunál Distritál Dili hala'o julgamentu sumáriu ba kazu krime kondusaun sein karta ne'ebé involce arguidu GGG, iha 24 Marsu 2015, iha Kolmera, Distritu Dili.

Ministériu Públiku akuza katak iha 24 Marsu 2015, maizumenus iha tuku 20:00 kalan, polísia tranzitu prende tiha kareta pajero ne'ebé mak arguidu kondus no hatama arguidu ba sella polísia tanba kondus kareta sein karta kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sein karta.

Durante julgamentu arguidu uja nia direitu nonok. Testemuña SS (membru polísia) depoimentu katak nia no membru polísia sira seluk prende arguidu nia kareta tanba la iha karta kondusaun.

Iha alegasaun finál, ministériu públiku husu ba tribunál atu kondena arguidu ho pena multa US\$10,00. Alegasaun bazeia ba faktus sira iha akuzasaun no testemuña nia depoimentu.

Defeza husu ba tribunál atu aplika pena multa US\$5.00 tanba arguidu foin primeira-ves mai iha tribunál no nu'udar estudante ne'ebé laiha rendimentu ne'ebé fixu.

Tribunál konklui prosesu ne'e no kondena arguidu ho pena multa US\$90.00 no selu US\$1.00 durante loron 90 no pena alternativu loron 60 iha prizaun kuandu arguidu la selu pena multa refere. Tribunál mós bandu arguidu la bele kondus kareta durante loron 60.

52. Krime kondusaun sein karta - Nú. Prosesu : 0040/Sum/2015/TDDIL

Kompozisaun Tribunál : Singulár
Juis : Dra. Jacinta Correia da Costa
Ministériu públiku : Dr. Rogerio Viegas
Defeza : Dr. Estaque Guterres
Konkluzau : Kondena ho pena multa

Iha 27 Marsu 2015, Tribunál Distritál Dili hala'o julgamentu sumáriu ba kazu kondusaun sein karta ne'ebé involve arguidu MM, iha 24 Marsu 2015, Kolmera, Distritu Dili.

Ministériu Públiku akuza katak iha 24 Marsu 2015, maizumenus iha tuku 20:30 kalan, polisia tranzitu prende arguidu nia motor no hatama arguidu ba sela polisia tanba arguidu la iha karta kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sein karta.

Iha julgamentu arguidu uja nia direitu nonok. Maske nune'e, testemuña SS (membru polisia) depoimentu katak nia no membru polisia sira seluk prende tiha arguidu nia motor tanba arguidu laiha karta kondusaun.

Iha alegasaun finál, ministériu públiku husu ba tribunál atu kondena arguidu ho pena multa US\$10,00. Defeza husu ba tribunál atu aplika pena multa US\$5,00 tanba arguidu nu'udar estudante.

Tribunál konklui prosesu kazu ne'e no kondena arguidu ho pena multa US\$90,00 no sei selu US\$1.00 durante lora 90 no pena alternativu lora 60 iha prizaun. Tribunál mós bandu arguidu la bele kondus motor durante lora 60.

53. Krime kondusaun sein karta - Nú. Prosesu : 0041/Sum/2015/TDDIL

Kompozisaun Tribunál : Singulár
Juis : Dra. Jacinta Correia da Costa
Ministériu públiku : Dr. Rogerio Viegas (estajiáriu)
Defeza : Dr. Estaque Guterres (estajiáriu)
Konkluzau : Kondena ho pena multa

Iha 27 Marsu 2015, Tribunál Distritál Dili hala'o julgamentu sumáriu ba kazu krime kondusaun sein karta ne'ebé involve arguidu SdC, iha 24 Marsu 2015, iha Kolmera, Distritu Dili.

Ministériu Públiku akuza katak iha 24 Marsu 2015, maizumenus iha tuku 20:45 kalan, polísia prende arguidu nia motor no hatama arguidu ba sella polísia tanba arguidu kondus motor sein karta kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sein karta Durante julgamentu arguidu uja nia direitu nonok maibe testemuña SS (membru polísia) depoimentu katak nia prende arguidu nia motor tanba arguidu laiha karta kondusaun.

Iha alegasaun finál, ministériu públiku husu ba tribunál atu kondena arguidu ho pena multa US\$10.00. Alegasaun ne'e bazeia ba faktu sira iha akuzasaun no testemuña nia depoimentu. Enkuantu defeza husu ba tribunál atu aplika pena multa US\$5.00 tanba arguidu nu'udar estudante no laiha rendimentu fixu.

Tribunál konklui prosesu ne'e no kondena arguidu ho pena multa US\$90,00, no sei selu US\$1.00 durante loron 90. Alternativamente tribunál kondena ho pena prizaun loron 60 kuandu arguidu la selu pena multa refere. Tribunál mós bandu arguidu la bele kondus motor durante loron 60.

54. Krime kondusaun sein karta - Nú. Prosesu : 0042/Sum/2015/TDDIL

Kompozisaun Tribunál	: Singulár
Juis	: Dra. Jacinta Correia da Costa
Ministériu públiku	: Dr. Rogerio Viegas (estajiáriu)
Defeza	: Dr. Estaque Guterres (estajiáriu)
Konkluzau	: Kondena ho pena multa

Iha 27 Marsu 2015, Tribunál Distritál Dili hala'o julgamentu ba kazu kondusaun sein karta ne'ebé involve arguidu ZdCF, iha 24 Marsu 2015, iha Kolmera, Distritu Dili.

Ministériu Públiku akuza katak iha 24 Marsu 2015, maizumenus iha tuku 21:00 kalan, polísia prende arguidu nia motor no hatama arguidu ba sella polísia tanba arguidu kondus motor sein karta kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sein karta. Durante iha audiensia julgamentu arguidu mós uja nia direitu nonok. Testemuña SS (membru polísia) depoimentu katak sira prende tiha arguidu nia motor tanba arguidu laiha karta kondusaun.

Iha alegasaun finál, ministériu públiku husu ba tribunál atu kondena arguidu ho pena multa US\$10,00 hanesan mós kazu sira seluk bazeia ba faktus sira iha akuzasaun no testemuña nia depoimentu. Defeza husu ba tribunál atu aplika pena multa US\$5,00 tanba arguidu no foin primeira-ves mai tribunál.

Tribunál konklui prosesu kazu ne'e no kondena arguidu ho pena multa US\$90,00 no selu US\$1,00 durante loron 90. Tribunál mós aplika pena alternativu loron 60 prizaun kuandu arguidu la selu pena multa refere no bandu arguidu la bele lori motor durante loron 60.

55. Krime kondusaun sein karta - Nú. Prosesu : 0043/Sum/2015/TDDIL

Kompozisaun Tribunál : Singulár
Juis : Dra. Jacinta Correia da Costa
Ministériu públiku : Dr. Rogerio Viegas (estajiáriu)
Defeza : Dr. Estaque Guterres (estajiáriu)
Konkluzau : Kondena ho pena multa

Iha 27 Marsu 2015, Tribunál Distritál Dili hala'o julgamentu sumáriu ba kazu krime kondusaun sein karta ne'ebé involve arguidu MAG, iha 24 Marsu 2015, iha Kolmera, Distritu Dili.

Ministériu Públiku akuza katak iha 24 Marsu 2015, maizumenus iha tuku 21:15 kalan, polísia prende tiha arguidu nia motor no hatama arguidu ba sella polísia tanba arguidu nia motor laiha número polísia no la karta kondusaun.

Ministériu Públiku akuza arguidu kontra artigu 207 Kódigu Penál kona-ba kondusaun sein karta.

Durante iha audiensia julgamentu arguidu uja direitu nonok no testemuña SS (membru polísia) depoimentu katak nia prende arguidu nia motor tanba arguidu laiha karta kondusaun.

Iha alegasaun finál, ministériu públiku husu ba tribunál atu kondena arguidu ho pena multa US\$10,00. Alegasan ne'e bazeia ba faktus sira iha akuzasaun no testemuña nia depoimentu.

Defeza husu ba tribunál atu aplika pena multa US\$5,00 tanba arguidu laiha rendimentu fixu no foin primeira-ves mai tribunál.

Tribunál konklui prosesu kazu ne'e no kondena arguidu ho pena multa US\$90,00 ne'ebé sei selu US\$1,00 durante loron 90 no aplika pena alternativu loron 60 iha prizaun kuandu arguidu la selu pena multa refere inklui bandu arguidu la lori motor durante loron 60.

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org